



ТОШКЕНТ ҲАҚИҚАТИ

Вилоят ижтимоий-сиёсий газетаси

TOSHKENT HAQIQATI

1928 йил 11 декабрда асос солинган • 2004 йил 20 март, шанба • №23-24 (11.618-9) • Эркин нархда сотилади

НАВРЎЗИ ОЛАМ БАРЧАМИЗГА МУБОРАК БЎЛСИН!

Президент Ислам Каримовнинг Наврўз байрамига бағишланган тантанали маросимдаги табрик сўзи



ЮРТИМИЗДА БАЙРАМ ШУКУҲИ

Алишер Навоий номидаги Ўзбекистон Миллий боғида ўтган Наврўз байрами тантаналаридан репортаж

Хур диёримиз узра баҳорий насимлар эсмоқда. Дов-дарахларнинг куртак ёзишидан, ўт-ўланларнинг яна кўкка бўй чўзишию, қалдирғочларнинг вал-фажридан қалблар шодликка тўлмоқда. Шарқираб оқабган сув қишнинг рутубатли кунларида бир муддат тин олган чархпалакларга яна қайта "жон" киритган. Борлиқдаги жамики уйғониш, янгиланиш ва яшариш озод ва обод Ватанимизга яна улуғ айём, кут-барака элчиси — Наврўзи олам кириб келганидан дарак беради. Бу эзгулик, меҳр ва мурувват, одамийлик ва оқибат айёми яна дилларни сурур ва умидга тўлдириб келди. Жаннатмонанд ўлкамиз узра

байрамона руҳ ҳукмрон!

19 март. Соат 14.00. Алишер Навоий номидаги Ўзбекистон Миллий боғи байрамона безатилган. Бу ерга Қорақалпоғистон Республикаси, вилоятлар ва Тошкент шаҳри жамоатчилиги, дипломатик корпус, халқаро ташкилотлар вакиллари ташриф буюрган.

Тантанага йиғилганлар Ўзбекистон Республикаси Президенти Ислам Каримовни давомли қарсақлар билан кутиб оладилар.

Еру кўкни тутган чорлов муסיқаси байрам тантаналари бошланганидан дарак беради.

(Давоми 2-бетда).

ОЗАРБОЙЖОН РЕСПУБЛИКАСИ ПРЕЗИДЕНТИНИНГ ЎЗБЕКИСТОН РЕСПУБЛИКАСИГА ТАШРИФИГА ДОИР

Ўзбекистон Республикаси Президенти Ислам Каримов таклифига биноан Озарбойжон Республикаси Президенти Илҳом Алиев 2004 йил 23-24 март кунлари давлат ташрифи билан Ўзбекистонда бўлади.

Ташриф чоғида ўзаро муносабатларнинг бугунги аҳволи ва истиқболлари, томонларни қизиқтирган халқаро муаммолар муҳокама этилиши ва қатор икки томонлама ҳужжатлар имзоланиши режалаштирилмоқда.

Ассалому алайкум, қадрли ватандошлар! Табиат уйғониб, тобора чирой очиб бораётган мана шу гўзал кунларда сиз, азизларни, сизларнинг тимсолингизда бутун халқимизни яшариш ва янгиланиш рамзи бўлмиш Наврўз айёми билан муборакбод этишдан бахтиёрман.

Бугунги шодиёнада бизнинг қувончимизга шерик бўлаётган муҳтарам меҳмонларимизни, юртимиздаги элчихоналар ва халқаро ташкилотлар, чет эл оммавий ахборот воситалари вакиллари, барча дўстларимиз ва биродарларимизни қадимий ва азалий байрамимиз билан сизларнинг номингиздан, эл-юртимиз номидан самимий қутлайман.

Азиз дўстлар!

Шу кунларда эл-юртимиз қарши олаётган Наврўзи оламнинг ҳаётбахш нур-зиёси, ажойиб аломатлари ҳақида кўп гапириш мумкин. Лекин бу айёмнинг буюк бир хосияти борки, уни алоҳида таъкидлаш зарур.

Баҳор кириб келиши билан, мўтабар заминимиз яшил либосга бурканиб, куртаклар очилиши билан ҳар қайси тирик жон, ҳар қайси одам ўзининг она табиат фарзанди эканини чуқур ҳис этади.

Бу ёруғ дунёнинг бетакрор сеҳри ва гўзаллигини худдики янгитдан англаб, дилида мудраб ётган эзгу ниятлари, орзумидларини, қалбининг тўрида бўлган меҳр ва саховатини намён этишга интилади.

Мана шу файзли кунларда, баҳорнинг сумалак ва ҳалим каби тансиқ таомлари тортилган дастурхонлар атрофида ватандошларимиз Наврўз неъматларини, байрам қувончини ёру дўстлар билан баҳам кўришни, дунёга юрагини, бағрини очишни истайди.

Беморлар, етим-есир, кўнгли ярим инсонларга беминнат ёрдам ва кўмак беришга, табаррук кексаларимизни зиёрат қилиб,

уларнинг дуосини олишга шошилади.

Юртимизга Наврўзи олам — янги фасл, янги йил ўзининг қутлуғ қадамини қўйиши билан нуроний оталар, мунис момоларимиз дуога қўл очиб:

Ризқи насибамиз бутун бўлсин,
Дехқонларимизнинг омадини, баракасини берсин,

Ҳар бир оила, ҳар бир инсон бахтли бўлсин,
деб тилак қилади.

Ҳеч шубҳасиз, Меҳр ва мурувват йили деб эълон қилинган бу йилимизда бундай чин қалбдан чиқадиған, холис ва олижаноб, пок ниятлар ўзини шу юрт фарзанди деб билган ҳар қайси инсоннинг юрагида акс садо топади ва шу тилакларнинг ижобат бўлиши, диёримизни янада обод, ҳаётимиз фаровон бўлишига ўз ҳиссасини қўшишга ҳаракат қилади.

Мана шу гўзал, шукуҳли ва тароватли айёмда, одамнинг юраги юмшаб, гина ва аразлар унутилдиған шу лаҳзаларда мен барча юртдошларимизга қарата даъват қилмоқчиман:

Азизларим, биродарларим, бу ғанимат дунёда бир-биримизга меҳр-оқибатли бўлайлик, бир-биримизни асраб-авайлаб, қадрлаб яшайлик.

Агарки менинг бу сўзларим барча юртдошларимизга етиб борса ва уларнинг қалбидан жой олса, ўзимни ғоят бахтиёр ҳис қилган бўлардим.

Муҳтарам юртдошларим!

Яна ва яна бир бор сиз, қадрдонларимни, сизлар орқали барча ватандошларимни бағримга босиб, азиз ва ардоқли Наврўз байрами билан чин қалбимдан қутлайман.

Юртимиз тинч, осмонимиз мусаффо, халқимиз омон бўлсин!

Наврўзи олам барчамизга муборак бўлсин!

ҲУЖЖАТ ИМЗОЛАНДИ

Мамлакатимизда меҳмон бўлиб турган Япония ташқи ишлар вазирлигининг парламент котиби Исао Мацумия раҳбарлигидаги делегация Ўзбекистон Республикаси Ташқи иқтисодий алоқалар агентлигида бўлди.

Ўзбекистон Республикаси Бош вазирининг ўринбосари, мазкур агентлик раиси Элёр Ганиев билан музокарада мамлакатларимиз ўртасида савдо-иқтисодий ва илмий-техникавий ҳамкорлик алоқаларини янада мустаҳкамлашга оид масалалар муҳокама этилди.

Ўзбекистон ва Япония ҳукуматлари ўртасида «Озиқ-овқат маҳсулотлари ишлаб чиқаришни кўпайтириш» лойиҳаси доирасида беғараз ёрдам кўрсатиш бўйича алмашув ноталари им-

золанди. Умумий қиймати 420 миллион япон иенига тенг мазкур ёрдам Қорақалпоғистон Республикаси ва Хоразм вилоятида буғдой ва шולי етиштириш учун зарур қишлоқ хўжалиги техникасини харид қилишга сарфланади.

Шу кун япониялик меҳмонлар Ташқи ишлар вазири Содиқ Сафоев билан учрашиб, икки томонлама муносабатларни янада ривожлантиришга доир масалалар юзасидан фикр алмашди.

ТУМАН КЕНГАШИ СЕССИЯСИ

Шу йил 19 март куни иккинчи чақириқ халқ депутатлари Пскент тумани Кенгашининг навбатдан ташқари сессияси бўлиб ўтди. Унда ташкилий масала кўрилди.

Абдували Фофуров бошқа ишга ўтганлиги муносабати билан туман ҳокими вазифасидан озод этилди.

Убайдулла Абдуллаев Пскент тумани ҳокими этиб тасдиқланди.

Сессияда Тошкент вилояти ҳокими Козим Тўлаганов сўзга чиқди.

ЮРТИМИЗДА БАЙРАМ ШУКУҲИ

Сўз Ўзбекистон Республикаси Президенти Ислам Каримовга берилди.

Давлатимиз раҳбари юрдошларимизни боқий байрам – Наврўзи олам билан самимий кутлаб, унинг тимсолида халқимизнинг ўзига хос маънавияти, ўтмиши, асрий қадриятлари, миллий урф-одат ва анъана-удумлари тобора сайқалланиб, ривож топиб бораётганини таъкидлади.

Бу айём ҳамиша янгиланиш ва ёшлиқ, гўзаллик ва нафосат, меҳр ва мурувват, оқибат ва саховат, бунёдкорлик ва яратувчилик байрами сифатида кенг нишонлаб келинган...

Фусункор майдон узра борлиқ уйғониши – Янги кунни мадҳ этувчи майин наво таралади. Муסיкий оҳангларга кушлар чугур-чугури, сувнинг жилдираши, жисму жонимизни ўртагудек орзиқиб кутаётганимиз – баҳор ишвалари уйғунлашиб кетади. Шу майин куй-оҳанг оғушида кўз ўнгимизда зебо табиатнинг бетакрор фасллари гавдаланади, турфа гуллар юз очади, булбуллар хониш қилади. Гўё вужудга қайта жон инади, бамисоли қайта тугилгандек, яшаргандек ҳис этади инсон ўзини мана шундай дамларда.

(Давоми. Боши 1-бетда).



Карнай-сурнай ва ноғоралар садоси остида жарчилар элу юртни Наврўз сайлига чорлайди. Гўё уларнинг садоси она заминни қиш уйқусидан уйғотиб, борлиққа баҳор сеп ёйганидан дарак бергандек бўлади. Шу дамда беихтиёр ям-яшил қир-адирлар, гулга бурканган водийлар, лолақизғалдоқдан қизарган чўл-биёбонлар гавдаланади кўз ўнгимизда. Бинафша бўйлари димоқни қитиқлаб ўтгандек, заминдан кўкка ўралаётган ҳовурдан кўкракни тўлдириб нафас олгандек бўламиз...

Тантананинг "Хуш келибсиз!" деб номланган қисмида пойтахт вакиллари ўзларининг бетакрор санъатларини намойиш этади.

Давлатимиз раҳбари бу йилни Меҳр ва мурувват йили деб эълон қилди. Бу борада ҳукуматимизнинг махсус дастури қабул қилинди. Эзгу ниятлар билан номланган йилда ўтказилаётган Наврўз тантаналарида халқимизга хос меҳр ва мурувват фазилатларига алоҳида аҳамият берилган. Бу бежиз эмас. Зеро, йил бошида азалдан меҳр ва мурувват, одамийлик ва саховат барқарор бўлиши ҳусусида ният қилинади. Ана шу кунда жамики гина-қудуратлар ўртадан кўтарилиб, самимият ва меҳр-муҳаббат ришталари боғланади.

"Ўзбекистон гуллари йиғилмиш бу чаманга" деб номланган қисмда Қорақалпоғистон Республикаси ва вилоятларнинг бадиий фольклор ва этнографик жамоалари ўзларининг ранг-баранг дастурларини намойиш эта бошлайдилар. Ҳар бир ҳудуднинг чиқишларида унинг ўзига хос халқ ўйинлари, кўшиқ, лапар, рақс ва аскиялар ижро этилади. Ҳур диёримизда бир тану бир жон бўлиб яшаётган барча миллат ва элатлар вакиллари-нинг бадиий чиқишлари қалбларни фаҳрга тўлдиради.

Кун билан тун тенглашадиган Наврўзга азалдан ажодларимиз ризқ-насиба, нажот ва баракот фурсати сифатида қараган. Ана шу кундан бошланган баҳорий юмушлар, деҳқон далага кўш чиқариб, барака уруғи сочган. Ерга дон сочилгани учун ҳам бу кун дошқозонларда сумалак, ҳалим қайнатилган, кўпкари, пойга каби халқ ўйинлари ташкил этилиб, дорбозу морбозлар, полвону масҳарабозлар томоша кўрсатган. Бугун бу азалий анъаналаримиз янада бойиб, теран маъно касб этмоқда.

Ҳар йили Наврўз байрами арафасида шаҳар ва қишлоқларимизда барпо этилган янги иншоотлар, корхона ва ўқув муассасаларини фойдаланишга топшириш анъана тусини олган. Бундай тадбирларнинг аввали мавжлашиб оқаётган Амударё узра қурилган янги кўприкнинг очилиш маросимидан бошланди. Унинг очилиши тантанасида Президентимиз Ислам Каримов иштирок этди. Зеро, бу иншоотни бунёд этишнинг ташаббускори ва раҳнамоси Юртбошимиздир. Халқ хўжалиги учун муҳим стратегик аҳамиятга эга мазкур иншоот мамлакатимиз, хусусан воҳа аҳлининг кўпдан-кўп муаммоларини ечишга кўмаклашади, элларни эллар билан, дилларни диллар билан боғлайди.

Бунёдкорлик майдонига айланган юртимизда шу кунларда янги қўшма корхоналар, ишлаб чиқариш объектлари, академик лицей ва касб-хунар коллежлари, қишлоқ врачлик пунктлари, спорт мажмуалари, маданият ва хизмат кўрсатиш иншоотлари фойдаланишга топширилмоқда. Бундай сўй-ҳаракатларнинг маъно-моҳиятида аҳолининг турмуш тарзини янада яхшилаш, фаровон ва тўкин ҳаётни таъминлашга интилиш, бир сўз билан айтганда, кишиларга меҳр ва мурувват кўрсатиш нияти мужассамдир.



Нафис анжуманининг "Ҳаёт чечаклари" деб номланган фаслида саҳнага ширин-шакар болакайлар кириб келади. Юзларида эзгулик балқиган кичкинтойларнинг шўх-шодон кулгилари, жарангдор куй-кўшиқлари, жозибадор рақслари кишини завқлантириб юборади. Уларнинг самимияти беихтиёр сизга кўчади.

Юртимиз азалдан кураги ерга тегмаган полвонлари билан ном қозонган. Истиклол шарофати билан ўзбекнинг кураши дунёни забт этмоқда. Бугун ўзбекона яқтак кийиб, ўзбекча "таъзим", "ҳалол", "ёнбош", "чала", "дакки" каби ибораларга амал қилиб кураш тушаётганларни дунёнинг барча қитъасида учратиш мумкин. Спортчи ўғил-қизларимизнинг донғи олам узра ёйилмоқда, уларнинг ғалабалари шарафига юртимиз мадҳияси олиймақом мусобақаларда янграб, байрогимиз сарбаланд кўтарилмоқда.

Байрамда ўзбек миллий кураш мактабининг анъаналарини маҳорат билан давом эттираётган янги авлод вакиллари, спортимиз намояндлари, цирк усталари, Ўзбекистон байроғини халқаро майдонларда баланд кўтарган спортчиларимиз ҳозир бўлади. Улар орасида Президентимиз ташаббуси билан ташкил этилган уч босқичли узлуксиз спорт тизими – "Умид ниҳоллари", "Баркамол авлод", "Универсиада" каби оммавий спорт ўйинлари голибларини кўришимиз мумкин. Ўзининг мардонатор ғалабалари билан юртимиз шухрати-га шухрат қўшган спортчиларимиз борлигидан қалбларимиз гурур ва ифтихорга тўлади.

Бу нафис анжуманда ўзбек халқига хос гўзал инсоний фазилатлар – меҳнатсеварлик, ватанпарварлик, фидойилик, яқдиллик ва аҳиллик, тинчликка интилиш туйғулари бетакрор халқ кўшиқлари ва замонавий ашулалар воситасида юрак қатларига тобора чуқурроқ сингади.

Тантананинг "Сен баҳорни соғинмадингми?" деб номланган қисмидан ўрин олган санъат усталари, эстрада юлдузлари, ёш санъаткорларнинг, айниқса, санъатимизнинг навқирон вакиллари, "Ниҳол" мукофоти совриндорлари, "Ўзбекистон – Ватаниманим", "Азиз она юртим навалари" танловлари голибларининг Ватанини, Наврўз ва муҳаббатни мадҳ этган чиқишлари қалбларни тўлқинлантириб юборади. Она Ватанга муҳаббат ва садоқат туйғуси барчамизни бирлаштирувчи, келажак сари илдам етакловчи буюк куч эканлигини чуқур ҳис қиламиз.

Ажойиб куй-кўшиқларга мушакбозлик уланиб кетади...

Байрам тантаналаридан сўнг Президент Ислам Каримов оммавий ахборот воситалари вакиллари-га интервью берди.

– Наврўзни кўтаринки кайфият билан нишонлаш эзгу ниятлар билан яшаётган халқимизга ярашади, – деди Юртбошимиз. – Халқимиз табиатидаги адолатга, ёруғликка интилиш, ўзининг ҳаёт тарзини шунга мос равишда йўлга қўйиш қадимий байрамимиз билан уйғундир. Мазкур йил бежиз Меҳр ва мурувват йили деб эълон қилинмади. Бинобарин, бағрикенглик, бир-бирига меҳр-мурувват кўрсатиш халқимизнинг азалий одатларидан биридир. Ёшларимиз буюк ажодларимизга муносиб авлод бўлиб етишишдек улғу мақсад билан яшашлари лозим.

Юртимизда, унинг узоқ-яқин шаҳар ва қишлоқларида байрам шодиёналари давом этмоқда.

Байрамларинг ўзинг каби боқий бўлсин, она халқим!

Норали ОЧИЛОВ,
ЎЗА шарҳловчиси.

СУРАТЛАРДА: тантанадан лавҳалар.

А. ТЎРАЕВ, Д. ЮСУПОВ,
С. ЎРМОҢОВ (ЎЗА) олган
суратлар.



ОЛМАЛИҚДА АЙЁМ БОШЛАНДИ

Етмишдан ортиқ миллат вакиллари истиқомат қилаётган Олмалиқ шаҳрида бу йил Наврўз одатдагидан ўзгача қарши олинмоқда.

– Баҳор байрамини кўтаринки руҳда нишонлаш учун жиддий ҳозирлик кўрдик, – дейди шаҳар ҳокими ўринбосари Муҳаббат Дўсметова. – Наврўз арафасида ўтказилган умумхалқ ҳашарида 45 мингдан зиёд киши иштирок этди. Ўн минг туп мевали ва манзарали дарахт ниҳоллари ўтказдик. Мавжуд 41 маҳалла, ўнлаб ташкилот ва муассасалар ҳудудида ободонлаштириш ва кўкаламзорлаштириш ишлари амалга оширилди.

Умумхалқ ҳашаридан тушган маблағнинг асосий қисми аҳолини ижтимоий ҳимоялашга йўналтирилмоқда.

Бунёд этайлик

Хар биримиз кўклами, баҳорни алоҳида бир интиқлик билан кутамиз. Тонг кўёши кулиб чиқиб, илиқ шабада енгил эсиб, қиш ғубори кўтарила бошлагач, офтобру жойларда кексаларнинг куюк-куюк суҳбатлари устида «ёруғликка чиққанлик» шукронаси эшитилади, болакайлар шодон қийқириб, копток тепишни бошлашади, қизалоқлар чертмак чизигини чизиб қолишади. Шундайгина уларнинг тепасида — куртاكلари бўрта бошлаган гилос, ўрик, олма, олча дарахтларида ғужгон ўйнаб, қушлар базми авж олдиришади.

Мана бир ойдан ошдики, шаҳар ва қишлоқларимизда шундай манзараларни кузатиш мумкин. Қаёққа қараманг — жонланиш, интилиш, яратиш, яшнатиш. Вилоятимизда улкан бунёдкорлик ишлари бошланмоқда. Алоқа тармоқларини замонавий асосларда янгилаш, олис-чекка қишлоқларни ҳам яхлит алоқа тизими билан қамраб олишга интилиш шу Наврўз кунлари янги куч билан бошланди. Аҳолини табиий газ, ичимлик сув билан таъминлаш йўналишидаги ишлар жадал тус олдирилди. Мактаб ва касалхоналарни қуриш-таъмирлаш мақсадлари учун миллиард-миллиард сўм маблағ ажратилмоқда.

Каттаю кичик ҳаракатда: бир-бирига елкадош бўлсам, бир-бирига кўмақдош бўлсам, дейди. Хар куни дарс машғулотлари тугагач, айтайлик, Янгийўл тиббиёт коллежининг тўптўп талабалари шаҳар маҳаллаларига йўл олишади. Улар, меҳр-мурувват гуруҳининг аъзолари, якка-ёлғиз қариялар, ногиронлар хонадонларида супуриш-сидириш, ер чопиш ишларини бажариб, бошқа дастёрликлар қилишади.

— Шаҳримизда синиқ кўнгилларни кўтариш, меҳр-оқибат кўрсатишга қаратилган бундай саъй-ҳаракатлар яратувчилик, бунёдкорлик ишларига омукта бўлиб, хар кун, хар соатда намоен бўлиб турибди, — деди Янгийўл шаҳрининг ҳокими Зафар Файзуллаев. — Бир қатор жамоат ташкилотларининг фаолларимиз иштирокида ўтган кўшма мажлисида қабул қилинган мурожаатнома Наврўз байрами арафасида аҳолининг барча қатламларини оёққа турғазди. Ободонлаштириш, кўкаламзорлаштириш ишларида каттаю кичик қатнашмоқда. Шаҳримиз бамисоли катта бир қурилиш, бунёдкорлик майдонига айланди...

Умумхалқ байрами арафасида шаҳар маҳаллаларини кезсангиз, ҳоким айтганича борлигига ишонч ҳосил қиласиз. Мустақиллик, Олтинобод, Муқимий номли, Рамадон, Охунбобоев номли, Назарали Ниёзов номли маҳаллалар шу баҳор кунлари яна ҳам обод бўлиб, кўркам қиёфа касб этди. «Саломатлик» мажмуаси, маиший хизмат корхоналари ва савдо шохобчалари, маданий-маърифий марказлар бугунги маҳаллаларнинг таркибий тузилмаларига айланиб бормоқда.

Шу Наврўз байрами арафасида биргина Янгийўлда 16 та янги иншоотлар битказилди. Биргина «Я-ДЕМ текстил» кўшма корхонаси ишга туширилиши билан 1500 ишчи ўрни очилди. Бу кўшма корхона Туркия сармоядорлари билан ҳамкорликда барпо этилди. «Анжом-Бунёд» корхонасида ҳам шу байрам кунлари 30 киши ўз иш ўрнига эга бўлаётир. Бир гуруҳ тадбиркорлар Самарқанд ва Рашидов кўчалари туташган жойда сайлгоҳ барпо этиш ташаббуси билан чиқиб, шу мақсадга 10 миллион сўм маблағ ажратилди. Файзобод маҳалла гузарига «Устозлар» хусусий фирмаси 3 миллион сўм маблағ сарфлаб, умумий овқатланиш ва маданий-маиший хизмат кўрсатиш мажмуасини барпо этди.

Шу кунларда 3-касб-хунар коллежининг директори Маққулбек Беаловнинг қувончию ширин ташвишлари мўл. Қувончи шундаки, ниҳоят коллеж учун замонавий лойиҳа асосида мутлақо янги, 525 ўринга мўлжалланган муҳташам бир бино битказилаяпти. Бу қурилиш учун ажратилган 1 миллиард 100 миллион сўм маблағ жой-жойига қўйилишини, ишларнинг сифатини кузатиб бориш осонмас, албатта. Бу энди директорнинг ёқимли ташвиши. Қурилиш-ободонлаштириш ишлари битгач, коллеж ниҳоятда файзли, кўркам қиёфага киражаги ҳозирдаёқ сезилиб турибди.




Ҳа, дарвоқе, касб-хунар коллежи қурилиш-ободонлаштириш майдонида мунғайибгина турган эски бир уй кўзга ташланди. Буни сезиб директор Маққулбек Беалов:

— Бир пайтлар мутахассислар учун қурилган экан, — дея изоҳ берди. — Ҳозир биргина онахон яшайдилар. Шаҳар ҳокимлиги кўп қаватли уйлардан бўш хонадон таклиф этаяпти, онахон танлаяптилар. У киши кўчишлари билан бу бинони бузиб, коллежимиз боғини кенгайтирамиз.

Янгийўлда ўтган асрдан қолган бундай

Вилоятимизда улкан бунёдкорлик режаларини амалга оширишга киришилди. Алоқа тизими, газ ва сув таъминотини яхшилаш, халқ таълимининг моддий-техника базасини мустаҳкамлашга қаратилган истиқболли дастурлар ишлаб чиқилиб, рўёбга чиқарила бошланди.

ИСТИҚЛОЛ ИНШОТЛАРИ



«ёдгорликлар» сероб. Шаҳар ҳокимлиги, жумладан, бир пайтлардаги пахта заводи барак уйлари бузиб ташлашга, уларда яшаб келган оилаларни қулай шароити бўлган кўпқаватли уйларга кўчиришга қарор қилди. Шу тариқа одамларнинг уй-жой шароити яхшиланапти.

— Шундай ноқулай шароитда яшаётган 56 хонадонни йил охиригача кўчириб, одамларнинг турмуш шароитларини яхшилаш ниятида, — деди шаҳар ҳокимлигининг ижтимоий масалалар бўйича бош мутахассиси Шукур Хошимов суҳбат якунида.

Ҳа, унчалик оддий бўлмаган шароитларда ҳам излаган имкон топади. Янгийўл шаҳрида, масалан, шундай имконлар ишга солинаяпти. Бугун кўча ва майдонларни айлансангиз, байрамона бир шукуҳ сезасиз. Ҳаммаёқда янгиланиш, яратувчилик кайфияти ҳукмрон. Ўз шаҳрини обод ва кўркам қилиш, ҳаётни гўзаллаштиришга интилиш кучли.

Янгийўлда байрам олди кайфияти шундай. Бутун вилоят Наврўз байрамига шундай ўзгача бир руҳ билан келди. Бу кайфият ободонлаштириш ва кўкаламзорлаштириш икки ойлиги эндигина эълон қилинган дастлабки кунларданок устувор. Ўша кезлари вилоят ҳокимлигида ишларнинг ҳажмлари, уларнинг бажарилиш муддатлари аниқ белгилаб олиниб, ишга астойдил киришилди.

Бугун шу қатъиятнинг самараларини кўриб турибмиз. Шундай қилмаса ҳам бўлмасди асли. Шуни айтиш кифояки, Наврўз кунлари вилоятимиз шаҳар ва туманларида 154 та қурилиш — байрам иншоотлари пардозлаш-топшириш ишлари поёнига етказилаяпти. Бу — айтишга осон. Агар бу иншоотларни вилоят харитасида шаҳарма-шаҳар, қишлоқма-қишлоқ кўздан кечириб чиқсангиз, шундагина байрам арафасида бажарилган ишларни яхлит бир бутунликда, яққол тасаввур қилишингиз мумкин бўлади. Шундай ҳам қилдик. Мана, Паркентнинг байрам иншоотлари: бугун ўша режалар асосида жами 1460 ўринли 45- ва 3-мактаб биналарини қуриш тугалланиб, уларнинг очилиш вақти тайинлаб қўйилди. Шаҳар марказида яхлит савдо ва маиший хизмат кўрсатиш мажмуи битказилди, газ тармоғи 4,3 километрга узайтирилди, 2,5 километр масофада ичимлик сув тармоғи барпо этилди. Газ элтувчи иккинчи тармоқ эса яна беш километрга чўзилди. «Оққўрғон» ширкат хўжалигида болалар спорти мажмуаси очилаяпти. Қуйчирчиқнинг «Янги ҳаёт» ширкат хўжалигида 200 квадрат метр саҳни маиший хизмат корхоналари ишга тушаяпти.

Байрам арафаси кунлари вилоятнинг қайси шаҳри ёки қишлоғига борманг, шу сингари яратувчилик ишларининг гувоҳи бўласиз. Қайси шаҳар ёки туманга телефон қилманг, бир янгилик:

— Мева ва сабзавотни қайта ишлаш цехини битказдик...

— Янги ўқув-ишлаб чиқариш марказимизда машғулотлар бошланди...

— Қишлоғимизга бир келинг, гузаримизни таниёлмайсиз...

Сўнгги жавобни Бўканинг Ачамайли қишлоғидан олдик. Бу ерда қисқа муддатда гузар мутлақо янгича кўриниш касб этди. Бўка-Пскент йўлининг икки бетида замонавий бинолар, сайлгоҳ ва зиёратгоҳ, гулзор хиёбонлар барпо этилди.

Булар халқимизнинг ўз юртини обод этишга бўлган интилишлари самараси. Бу — Наврўз байрамини муносиб нишонлашга отланган юрт салоҳиятию имконларининг кўлами амалда намоен бўлиши.

Қадимий Наврўз байрамининг дилларни қувончга тўлдирувчи эпкинлари бугун хонадонларимизга кириб келяпти. Гулзор майдонларда, кўркам хиёбон ва оромбахш сайлгоҳларда куй-қўшиқлар янграй бошлади. Қозонларда сумалаклар қайнаяпти, гузарларда жарчилар элни ҳалимга чорламоқда.

Озод, мустақил, келажаги нурли Ўзбекистон халқлари Наврўзни байрам қилишаяпти.

Жўрабек МУРОДОВ.

СУРАТЛАРДА: вилоятимиз шаҳар ва қишлоқларидаги Наврўз иншоотлари.

Яратайлик, яшнаатайлик

Шарқда байрамлар кўп. Ҳар бирининг ўз хислати, моҳияти бор. Шу маънода Наврўз алоҳида мавқе ва нуфузга эга. Хусусан, у шарқликларнинг энг сеvimли ва ардоқли байрами. Бошқа байрамлар-

дан алоҳида ажралиб турадиган ўзига хос жиҳати шундаки, у бир кунлик ёки бир ҳафталик байрам эмас, Наврўз тантаналари жойларда бирин-кетин бошланиб, қарийб бир ой давом этади.

ЙИЛБОШИ ҚУТЛУҒ БЎЛСИН!

Бу кўҳна, аммо, ҳеч қачон эскирмайдиган, мазмун-моҳияти жиҳатидан баҳор, уйғониш, кўкариш, янгиланиш билан боғлиқ байрам турли даврларда ва турли минтақаларда турлича талқин этилган, таъриф ва тавсифланган. Масалан, бизнинг ўтмиш авлод-аждодларимиз уни янги йилнинг бошланиши, яъни йилбоши деб атаганлар. Йилнинг бу фасли бутун борлиқнинг қиш уйқусидан уйғониб, амал олиши, униши, кўкариши даврига тўғри келгани боис Наврўз, яъни Янги кун сифатида нишонланган. «Биринчи кўш», «Кўш оши», «Биринчи пушта» каби кўҳна удумларнинг ушбу байрам билан боғлиқ миллий маросимлар қаторидан ўрин олганлиги ҳам табиий ҳолдир.

Кўриниб турибдики, бизнинг давримизга келиб, Наврўзга меҳнат байрами сифатида таъриф берилишида жон бор, албатта. Зеро, Янги кун меҳнат билан бошланади. Ҳаво илиб, кун билан тун тенглашиб, яъни ҳамал кириб, ердан ҳовур кўтарилиши билан деҳқон ҳам экин-тикин ишларини кўмсаб, дала-сига отланади. Демак, Наврўз деҳқонлар байрами аслида, деган гап ҳам ўринлидир. Деҳқоннинг бор бойлиги, бутун қувончу умиди — ер, дала. Шу боис ҳар йили кўкламда дала ишларининг бошланиши деҳқон учун байрам.

Вилоятимизнинг дала ва боғларида деҳқон байрами бошланиб кетганига анча бўлди. Одатдагидек, кўкламги экин-тикин ишларига боғбону соҳибкорлар биринчи бўлиб киришдилар. Йўл ёқаларига, ариқларнинг бўйларига ҳар хил мевали ва манзарали дарахт ҳамда турфа гул кўчатлари ўтказилди. Шредер номидаги боғдорчилик, узумчилик ва виночилик илмий-ишлаб чиқариш бирлашмаси ҳамда Қибрай туманидаги «Тошкент» кўчатчилик ширкат хўжалиги аъзолари сифатли кўчат етказиб бе-

ришда жонбозлик кўрсатдилар.

Айни кунларда дала айланган киши дид ва маҳорат билан шакл берилиб, таналари текис оқланган, қатор оралари бир дона ҳам гиёҳ қолдирмай, юмшатиб кўйилган мевали боғлардаги манзарани кўриб кўзи қувонади. Сабзавоткор туманларда минглаб гектар майдонларга барвақт плёнка остига экилган эртаки карамнинг олди ҳосил ўрай бошлади. Хуллас, бугун деҳқонлар мевали боғ ва далаларда ризқ-рўз уна бошлаганини кўриб, бир қувонишса, қалин туплаб, бошоқлаш даврига кира бошлаган ғаллазорларга қараб, яна бир суюнишади.

Давлат эҳтиёжлари учун ғалла етиштириш буюртмасига мувофиқ 115 минг гектар суғориладиган ер ва 20 минг гектар лалмига экилган ғаллани парваришlash давом эттирилмоқда. Асосий эътибор йиллик меъёрадаги маъданли ўғитларни вақтида бериш ва ёмғир сувлари билан кифояланмай, ғаллани шарбатга қондиришга қаратилмоқда.

Ҳар гал кўклам келганда, элимизнинг суюкли шоираси Зулфияхонимнинг «Баҳор келди сени сўроқлаб» сарлавҳали машҳур шеъри ёдга келади. Бу шеър яшариш, покланиш фасли бўлган кўкламнинг инсон аҳлига мурожаатидек бўлиб туюлади бизга. Дарҳақиқат, кўм-кўк либос кийган далалар, чаман бўлиб гуллаган боғлар «эй, инсон, сен интиқлик билан, энтикиб кутган дамлар келди, ризқ-рўзим бутун, дастурхоним тўкин бўлсин, десанг дамни ғанимат бил, далага чиқ, боғларни орала, меҳнат билан кўркамлик бер» деяётгандек гўё.

Тошкент, Зангиота, Қибрай туманлари деҳқон ва боғбонлари ҳар йили кўкламга алоҳида тайёргарлик кўришади. Шунинг учун ҳам бу туманларда ҳосилдорлик ортиб бормоқда. Шу билан бирга пахтакор туманларда ҳам боғдорчилик, узумчиликда меҳнатни ташкил қилишнинг пудрат, ижара усуллари кўлланилиб, ижобий ўзгаришларга эришилмоқда. Пудратчилар, ижарачилар ўзлари

эгалик қилаётган боғ-роғларга янгича муносабатда бўлиб, ҳар бир туп мевали дарахт ва ток тупларини алоҳида меҳр билан парваришлаб, мўл ҳосил олмақдалар.

Наврўз байрами тантаналари оммавий тус олган айни кунларда пахтакор туманларда плёнка остига чигит экиш, қолган ерларни текислаб, очиққа уруғлик қадашга сифатли тайёрлаш ишлари қизғин олиб борилмоқда. Зеро, кўкламги экиш мавсуми билан уйғунлашиб кетадиган баҳор ва меҳнат байрамини бевосита далаларда яхши кайфият ва кўтаринки руҳдаги яратувчан меҳнат билан нишонлаш вилоятимиз пахтакорлари учун хайрли аънамага айланган.

Бу йил вилоят бўйича 108 минг, шу жумладан 24 минг гектар майдонда плёнка остида



пахта хом ашёси етиштириш режалаштирилган. Ҳозир уруғлик чигитни плёнка остига қадайдиган 349 та маҳсус мосланган сеялка юксак унум билан ишлатилмоқда. Улар ҳар йилгидан фарқли ўлароқ эгатнинг ҳар метрида 12 та уя ҳосил бўладиган қилиб мослаштирилган. Бу эса, ҳар гектар майдонда 135-140 мингта кўчат олиш, яъни ҳосилдорликни 20 фоиз атрофида ошириш имконини беради.

Чигит очиққа экиладиган майдонларни сифатли тайёрлаш ишларига 600 дан зиёд занжирли трактор, 211 та ер текислайдиган механизмлар, 250 та чизел, 8500 та тишли борона, 730 та оғир ва енгил мола сафарбар этилган. 600 дан зиёд сеялка эса ишга шай ҳолда турибди. Ҳадемай улар далага олиб чиқилиб, чигит экиш қизғин бошлаб юборилади. Демак, айни кунларда туман ва қишлоқ марказлари, хиёбон ва сайлгоҳлар ҳамда маҳалла гузарларида давом этаётган Наврўз байрами тантаналари бевосита далаларга кўчиб, яратувчан меҳнат билан уйғунлашиб кетади ва Наврўзнинг меҳнат ҳамда зиратчилик байрами эканлигининг амалдаги намоишига айланади.

Вилоят қишлоқ ва сув хўжалиги бошқармаси.



Янгийўл туманидаги «Ковунчи» ширкат хўжалиги аъзолари плёнка остига чигит қадашга биринчилар қатори киришдилар. Бу йил пахта учун ажратилган 607 гектар майдоннинг 155 гектарыда ҳосилни шу усулда етиштириш режалаштирилган. Ҳозир 2 та маҳсус сеялка юксак унум билан ишлатилиб, кунига 10 гектар майдонга уруғ қадалмоқда.

СУРАТЛАРДА: бош пудратчи Абдумутал Аноров пудратчи Дилфуза Йўлдошева даласида экиш сифатини текширмоқда; чигит экиш пайти.

Даврон АХМАД олган суратлар.

БАҲОРНИНГ ЎЗ ИФОРИ БОР

Баҳорнинг ҳақиқий тароватини, тафтини даставвал қишлоқда турадиган одам ҳис этади. Эрта баҳорда далаларга кўм-кўк ғиламнинг тўшалиши, боғ-роғларнинг яшилликка бурканиши киши дилига ҳузур бахш этади.

Бу йил ҳам ҳовлимдаги дарахтлар қуртак чиқарганда набираларимга кўшилиб қувонганимни айтмайсизми. Улар дарахт гулини кўриб, олма, анжир ейишларидан қувонсалар, мен кўкламга эсон-омон етиб келганимиз шукронасини қилдим.

Ҳар Наврўз байрами кунини бир мевали кўчат экишни одатга айланттирганман. Чунки, янги куннинг бошланиши-

да янги бир ниҳол қадасам, келажакда у ўз меваси билан инсонларни хушнуд этса, дейман. Бу ҳам Наврўзни менга берган бир хислати бўлса ажабмас.

Ахир, айтадиларку, бир кун умринг қолса ҳам ниҳол эк, деб.

Ўскан РЎЗИЕВ,
Қибрай тумани, пенсионер.

КЎМИТА ТАШАББУСИ

Вилоят табиатни муҳофаза қилиш кўмитаси ва унинг жойлардаги тизимлари ходимлари Меҳр ва мурувват йилида Наврўз байрамига муносиб тайёргарлик кўриш мақсадида аҳоли яшаш жойларини ободонлаштириш ва кўкаламзорлаштиришда фаол қатнашдилар.

Жойларда 3 минг тупдан ортиқ мевали ва манзарали дарахт кўчатлари экилди, 6 минг тупга яқин дарахтларга шакл берилди ва оқланди, 1500 та гул кўчатлари экилди, 8,5 километр ариқ-зовурлар тозаланди, 21 тоннадан ошиқ ахлат ва чиқиндилар йиғилди. Манзарали ўсимликлар экиш учун 0,7 гектар

майдондаги ерлар чопиқдан чиқарилди. Вилоят кўмитаси жамоасининг розилиги билан ходимларнинг бир кунлик иш ҳақи вилоятнинг «Маҳалла» жамғармаси ҳисобига ўтказилди. Экологлар баҳор байрамида ташкил этиладиган турли оммавий тадбирларда ҳам фаол иштирок этадилар.

Меҳр-мурувватли бўлайлик

ЖАМИЯТ АРДОҒИ

Халқимизнинг меҳр-мурувват кўрсатиш анъаналари ниҳоятда қадимий. Мустақиллик йилларида эса, Президентимизнинг саъй-ҳаракатлари билан бу таъмоиллар давлат сиёсати даражасига кўтарилди. Бугунги кунда вилоятимиз бўйича 280,7 минг киши давлат пенсияси ва нафақаларини олиб турганлиги эътиборга олинса, аҳолини ижтимоий ҳимоялаш миқёслари ниҳоятда кенг эканлигини тасаввур этиш мумкин.

2004 йил – Меҳр ва мурувват йили деб аталганлиги бу анъаналарни яна ҳам бойитиб, кексалар, ногиронлар, етим-есирлар ва кам таъминланган оилаларнинг моддий жиҳатдан қўллаб-қувватланишини яна ҳам кучайтириб юборди.

Пенсия ва нафақалар ҳамда уй-жой, коммунал хизмат тўлови ўрнига тўланадиган маблағлар ой сайин 5 миллиард сўмга етиб бормоқда. Бу тўловларни ўз вақтида таъминлаш мақсадида бюджетдан ташқари пенсия жамғармаси томонидан молиялаштириш ишлари ойма-ой амалга оширилади. Тошкент, Зангиота туманлари, Бекобод ва Оҳангарон шаҳарлари ижтимоий таъминот бўлимларининг саъй-ҳаракатлари билан бу тўловларни ойнанинг бошидан бошлашга эришилмоқда.

Ҳозирги кунда вилоятимиз бўйича 1513 нафар уруш қатнашчилари, 1925 нафар уруш ногиронлари, 5624 нафар байналмилал жангчилар, 30 минг 590 нафар уруш ортида меҳнат қилган шахслар, 6697 нафар болаликдан ногиронлар, 10 минг 253 нафар 16 ёшгача ногирон болалар, 3781 нафар ёлғиз қариялар, пенсионер ва ногиронлар рўйхатга олинган. Улар амалдаги қонунчилик билан белгиланган барча имтиёзлардан тўлиқ фойдаланиб келишмоқда. Муҳтож қария ва ногиронларни қўллаб-қувватлаш, уларга ҳар тарафлама ғамхўрлик қилиш ишлари ҳукуматимиз томонидан олиб борилган сиёсатнинг негизини ташкил этади ва улар йил сайин изчиллик билан, босқичма-босқич амалга оширилиб келинмоқда.

Ўзбекистон Республикаси Президентининг 1991 йил 27 майдаги Фармонида биноан ўзгалар парваршига муҳтож бўлган 2025 нафар ёлғиз фуқароларга тўққиз турдаги озик-овқат маҳсулотлари ва кирювиш воситалари ойма-ой ет-

казиб берилмоқда. Туман ва шаҳар ижтимоий таъминот бўлимларида фаолият кўрсатётган 352 нафар ижтимоий ходимлар ўзгалар парваршига муҳтож бўлган 2503 нафар ёлғиз кишиларга, 54 нафар ҳақ тўланадиган жамоат ишларига жалб қилинган ишсиз фуқаролар эса, 386 нафар ёлғизларга ва 10 нафар Қизил ярим ой жамиятининг жойлардаги патронаж ҳамширалари томонидан 53 нафар ёлғизга уйда ижтимоий хизмат кўрсатиш жорий этилган.

Вилоят ҳокимининг 2004 йил 9 февралдаги «Меҳр ва мурувват йили» дастурининг ижросини таъминлаш тўғрисидаги қарори бўйича пенсионер ва ногиронлар соғлиқни сақлаш бўлимлари томонидан диспансеризациядан ўтказилмоқда.

Дастурга биноан аҳолини ижтимоий қўллаб-қувватлаш мақсадида давлат бюджети ҳисобидан фақатгина жорий йилнинг январь ойида 5882 на-

фар кам таъминланган оилаларга 51,2 миллион сўмлик моддий ёрдам, 25 минг 672 нафар ишламаётган оналарга болани икки ёшга тўлгунча парвариш қилиш бўйича 282,4 минг сўмлик нафақалар, 10 минг нафар вояга етмаган болалари бор оилаларга 426,2 минг сўмлик нафақа тўланган.

Шу йилнинг биринчи чорагида Ўзбекистон Республикаси Меҳнат ва аҳолини ижтимоий муҳофаза қилиш вазирлиги тизимидаги «Товоқсой» сўхатгоҳида 45 нафар пенсионер ва ногиронлар ўз соғлиқларини тикладилар. Туман, шаҳар ижтимоий таъминот бўлимлари жойлардаги «Нуроний» ва «Маҳалла» жамғармаларининг бўлимлари, фуқароларнинг ўзини ўзи бошқариш органлари билан ҳамкорликда ёлғиз пенсионерлар, ногиронлар, боқувчисини йўқотган оилаларнинг уй-жойларини таъмирлаб, уларнинг яшаш шароитларини яхшилаш борасида амалий ишлар олиб бормоқда.

Тезкор маълумотларга кўра, фақатгина Наврўз умумхалқ байрами кунлари 1549 нафар ёлғизларга, 1291 нафар иккинчи жаҳон уруши қатнашчиси ва ногиронларига ҳамда 2275 нафар бошқа тоифадаги пенсионер ва ногиронларга, жами 26,9 миллион сўмлик ёрдам кўрсатилиши кўзда тутилмоқда.

Ўзбекистон Республикаси

Меҳнат ва аҳолини ижтимоий муҳофаза қилиш вазирлиги ёрдамида турли халқаро ташкилотлар билан ҳамкорлик ишлари кучайтириляпти. Наврўз байрами кунларида шундай ташкилотлардан бири 7 минг нафар боқувчисини йўқотган, кам таъминланган оилаларнинг фарзандлари, тўғма ногирон болаларга ўз ҳаёларини етказди. Ўтган ҳафта Зангиота туманида 349 нафар болаларга шундай совғалар топширилди. Яна бир ташкилот байрам кунлари 100 донаногиронлар аравачасини вилоятга етказиб бериш тарадудиди. Бу ҳозирги кунда реабилитациянинг ушбу воситасига муҳтож бўлган ногиронларнинг 65-70 фоизи оғирини енгил қилиш, олам қувончларига сазовор бўлишларини таъминлайди.

Вилоятимиздаги корхоналар, ташкилотлар, жамоа ҳўжаликлари, жамиятлар, ишбилармон тадбиркорлар ҳам шу каби инсонпарварлик ёрдами амалга ошираётдилар. Давлат дастури тадбирларининг бажарилишига ўз муносиб ҳиссаларини қўшаётдилар.

Турсумат ХОЛБОЕВ,
Тошкент вилояти меҳнат ва аҳолини ижтимоий муҳофаза қилиш бош бошқармаси бошлиғи вазифасини бажарувчи.



Бухоро шаҳрида Абдухолиқ Гиждувоний таваллудининг 300 йиллиги муносабати билан спортнинг каратэ тури бўйича республика биринчилиги мусобақалари ташкил этилди. Болалар ва усмирлар ўртасида ўтган ушбу биринчиликда вилоятимиз шарафини айниқса, Тошкент тумани спортчилари муносиб ҳимоя қилишди. Фозилжон Собиров, Комил Одиллов, Козимбек Гуломбеков, Ризамат Мирзараҳимов кабилар татамида маҳоратларини намойиш этиб, олтин медалларни қўлга киритишди.

Хуршида НАЗАРОВА.

Қибрай туманида Наврўз байрами арафасида замонавий маҳалла гузарлари сони яна биттага кўпайди.

Авваллари тумандаги Р. Мусамуҳамедов номли ширкат ҳўжалигида истиқомат қилувчи аҳоли зарур маҳсулотларни харид қилиш учун туман маркази ёки пойтахтга қатнашларига тўғри келарди. Энди бунга ҳожат йўқ. Маҳаллий тадбиркор Йўлдош Рашидов маблағига қурилиб, фойдаланишга топширилган маҳалла гузари ва бозорчада рўзгор эҳтиёжлари учун керакли бўлган барча буюмлар, озик-овқат маҳсулотлари муҳайё қилинган.



СУРАТДА: Ўртачирчиқ тумани, «Олмазор» маҳалласининг мўътабар онахонлари. Даврон АХМАД олган сурат.

БОЛАЛАР УЧУН ТУҲФАЛАР

Бизнинг 15-Меҳрибонлик уйимизда турли миллатларга мансуб кичкинтойлар тарбияланмоқда. Улар ўртасида меҳр-мурувват, оқибат, дўстлик ришталарини ўзаро боғлашда тарбиячиларимизнинг ҳиссаси катта бўлмоқда.

Хусусан, ахлоқ-одоб, юриш-туруш, кишилар ўртасидаги муносабат, миллий қадриятларимиз, урф-одатлар ҳам ўргатиб борилди. Ҳозирда болаларимизда ўзликни англаш, бошқа миллатларга, уларнинг тили, маданияти, санъати ва турли фазилатларига бўлган қизиқиш катта.

Тарбияланувчилар ўртасида турли кўнгилочар тадбирлар, би-

лимлар синови, спорт мусобақалари ҳам ўтказиб турилади. Булар дўстликни янада мустаҳкамламоқда.

Баҳор байрами арафасида боқувчисини йўқотган, меҳрга муштоқ қалблар кўнглини олиш мақсадида Меҳрибонлик уйида Наврўз тантанали нишонланди. Таълим ва фан ҳамда агросаноат ходимлари касаба уюшмалари вилоят кўми-

талари ҳомийлигида болалар кўнглини шод қилиш мақсадида байрам дастурхони ёзилди. Болаларимизнинг кўшиқ, рақс, шеър ва спорт мусобақалари дилларни хушнуд этди.

Меҳрибонлик уйи тарбияланувчиларига Ўзбекистон касаба уюшмалари федерацияси кенгаши 3 миллион сўмлик спорт кийимлари, касаба уюшмалари Тошкент вилояти кенгаши томонидан эса, 800 минг сўмлик пойабзаллар тақдим этилди.

Бундан болажонларимиз хурсанд бўлишди. Ишончим комилки, келгусида улар шу Ватан учун, халқимиз учун муносиб фарзандлар бўлиб етишишади.

Ўташ АБДУЛЛАЕВ,
Бўка туманидаги 15-Меҳрибонлик уйи директори.

«ЭНГ САРАНЖОМ-САРИШТА ОИЛА»

«Маҳалла» жамғармасининг вилоят бўлими ташаббуси билан шаҳар ва туманларда умумхалқ ҳашари олдидан хонадонлар, кўчалар тозалиги ва озодалигига эътибор кучайтирилди. Шу мақсадда маҳалларда «Энг саранжом-сарашта оила», «Покиза хонадон» кўрик-танловлари эълон қилинган эди.

Танловнинг шартига кўра, кўрсатиб ўтилган икки номинация бўйича шаҳар ва туманларнинг маҳалла жамғармаси бўлимлари томонидан маҳаллалардаги хонадон ҳамда оилаларнинг танлов талабига жавоб берадиганларидан бир нечтаси танлаб олинди. Эндиликда кўрик-танлов комиссиялари томонидан ушбу оилалар кўриб чиқилиб, ғолиблар аниқланади. Наврўз байрами кунини танлов натижалари эълон қилиниб, ғолибларга жамғарма таъсис этган совғалар топширилади.

Камол ҒАЙРАТОВ.


«РОВОН» НИНГ ХИССАСИ БЎЛАДИ

Наврўз байрамини жуда кўп пурмаъно иборалар билан таърифлашади. Уларнинг бири меҳр-мурувватли бўлишдир. Бу айём халқимизга хос саховатпешалик кўламида авж олади.

Шу куни кексалар ҳурмат-этибор билан қўриқиб олинади, муҳтож оилаларга ёрдам кўрсатилади, ёшлар эса меҳнат қўйнида бўладилар.

Бизнинг фирмамиз жамоаси ҳам ташкил этилгандан бери хайр-эҳсон ишларида баҳоли кудрат қатнашиб келяпти. Олинган фойданинг бири қисми шу мақсадга ажратилапти. Бу йил ҳам шу анъанага амал қиляпмиз. Шаҳарнинг фирмамиз жойлашган 6/4 даҳасидаги олти кам таъминланган оила бизга бириктириб қўйилган. Уларга мунтазам оталик ёрдами кўрсатиб келинапти. Наврўз арафасида анчагина озиқ-овқат маҳсулотлари тўпламини тортиқ қилдик. Шаҳардаги 34-меҳрибонлик уйининг тарбияланувчилари учун катта қозонда байрам таоми – сумалак тайёрлаб берамиз, ўзимизда ишлаб чиқарилаётган қандолат маҳсулотларидан ҳам тарқатамиз.

Фарида МИРАХМЕДОВА,
Ангрндаги «Ровон» хусусий
фирмаси раҳбари.



Ислоҳот мевалари

«Я-ДЕМ ТЕКСТИЛ»: «ЎЗБЕКИСТОНДА ИШЛАБ ЧИҚАРИЛГАН»

Мамлакатимизда пахта қайта ишлаш, ундан тайёр маҳсулот ишлаб чиқаришга катта эътибор қаролатилмоқда. Бунда юртимизда фаолият юритаётган қўшма корхоналарнинг ўрни беқиёс.

Куни кеча Сурхондарё вилоятининг Жаркўрган туманида «Сурхонтекс» Ўзбекистон-АҚШ қўшма корхонасининг очи-лиш маросими бўлган эди.

18 март куни пойтахт вилоятининг Янгийўл шаҳрида яна бир ана шундай замонавий корхона – «Я-ДЕМ текстил» Ўзбекистон-Туркия қўшма корхонасининг тантанали очи-лиш маросими бўлиб ўтди.

Маросимни Тошкент вилояти ҳокими К. Тўлаганов очди.

Янги корхонанинг умумий лойиҳа қиймати 20,7 миллион АҚШ доллари тенг. У Япония, Туркия, Италия, Германия, Жанубий Корея каби мамлакатлардан келтирилган замонавий тўқув ва тикув дастгоҳлари билан жиҳозланган. Унда бир йилда 24 миллион АҚШ доллари тенг маҳсулот ишлаб чиқарилади. Чиқарилаётган кийим-кечак асосан экспорт қилинади.

Маросимда сўзга чиққан Туркиянинг Ўзбекистондаги Фавкулудда ва Мухтор элчиси Решит Уман, «Ўзбекенгилсаноат»

давлат акциядорлик компанияси раиси А.Баҳромов, «Я-ДЕМ текстил» ишчиси Н.Мавлонова ва бошқалар мазкур қўшма корхона нафақат мамлакатимиз иқтисодий салоҳиятини юксалтириш, балки икки давлат халқлари ўртасидаги дўстона муносабатларни янада мустаҳкамлашда муҳим омил бўлиб хизмат қилаганини таъкидлашди.

Корхона бош директори Режеп Шириннинг айтишича, айна пайтда бу ерда етти юздан зиёд йигит-қиз меҳнат қилмоқда. Корхона тўла қувват билан иш бошлагандан кейин ишчи-хизматчилар сони уч баравар кўпаяди.

«Я-ДЕМ текстил»га келиб янги касбининг бошини тутганидан ва уни пухта эгаллаганидан жуда хурсандман, – дейди янгийўллик тикувчи қиз Санобар Муллажоновна. – Бу мамлакатимизда Президентимиз Ислам Каримов раҳнамолигида иқтисодиётимизни янада юксалтириш, халқимизнинг турмуш фаровонлигини оширишни кўзлаб амалга оширилаётган хайрли ишлар шарофатидан, деб биламан.

Маросимда Ўзбекистон Республикаси Бош вазири ўринбосари М. Усмонов сўзга чиқди.

ЎЗА.

БИЗ БИР ЁНДАМИЗ

Мамлакатимиз кимё саноатининг тўнғичи ва етакчиси ҳисобланган очиқ акциядорлик жамиятимизда беш ярим минг нафарга яқин ишчи-хизматчилар меҳнат қилишади. Улар сал кам элик миллатга мансуб кишилардир. Бу мўъжизакорларимизни қишлоқ хўжалик экинлари, айниқса, пахтачилик учун зарур бўлган маъданли ўғитларни мўл-кўл ишлаб чиқаришга қаратилган ягона мақсад, бир-бирига устозлик, бир-бирига шогирдлик қилиш, ўз зиммасидаги вазифани бажаришга сидқидилдан ёндошиш, умумиши учун қайғуриш, унга ҳисса қўшиш бирлаштириб турибди.

Шундай аҳиллик ва иноқлик ҳар қадамда намоён бўлмоқда. Наврўзни муносиб кутиб олиш ва уни умумхалқ байрами сифатида нишонлашга бўлган интилиш уни яна бир бор намоён этди. Унга ҳозирликнинг бориши давомида қатор чора-тадбирлар амалга оширилди. Икки марта хашар ўтказилди. Унда иштирок этган кимёгарларимиз корхонанинг ички ҳовлисини ва атрофдаги ҳудудларни ободонлаштириш ва қўқаламзорлаштириш билан шуғулландилар. Минглаб ишчи-хизматчилар ўз меҳнат ўринларида бўлиб, кўплаб маъданли ўғитлар ишлаб чиқардилар. Шу шанбаликларда ишлаб топган сармоя – салкам 61 миллион сўм ҳажмидаги иш ҳақи «Экосан» халқаро ва «Маҳалла» жамғармалари ҳисобига ўтказилди.

Шаҳарда Наврўз байрами жамиятнинг маъмурий биноси олдидаги кимёгарлар хиёбонида ўтказилади. Бунинг учун жамоамиз ўз кучи билан бу хиёбонни тўла таъмирдан чиқарди. Бу ерда мавжуд дарахлар танаси оқланди, янги мевали ва манзарали, чунончи, қимматбаҳо игнабаргли дарахлар кўчталари ўтказилди, гулзорлар барпо этилди.

Ҳар йилдагидек бу йил ҳам баҳор айёми муносабати билан хайр-эҳсон ишларига алоҳида эътибор берилаяпти. Корхона

маъмурияти ва касаб уюшмаси кўмитаси шу мақсадда бирталай ишларни амалга оширишади. Жумладан, меҳнат фахрийларининг ҳар бирига энг кам маош миқдорида пул берилади. «Мадад» фахрийлар кенгаши аъзолари учун байрам дастурхони ёзилиб, беш юз киши кутилади. Уйда бетоб бўлиб ётган кимёгарлар ҳам саховатдан четда қолишмайди. Жамоа вакиллари хонадонларга ташриф буюриб, уларга пул ва турли озиқ-овқат маҳсулотларини тарқатадилар. Шаҳардаги «Меҳрибонлик уйи» тарбияланувчилари учун дастурхон ташкил этилади. Жамоамиз унинг биносини қайта қуришда ҳам фаол иштирок этмоқда. Унинг биринчи қавати тўла таъмирланаяпти.

Мўъжизакорларимиз кутлуг айёмни меҳнат совғалари билан кутиб олмоқдалар. Йил бошидан бери деярли 11 миллиард сўмлик маҳсулот тайёрлаб, деҳқонларимизга етказиб берилди. Бу топшириқдагидан сал кам бир миллиард сўмлик ортиқдир. Маҳсулот ишлаб чиқаришнинг ўсиш суръати ўтган йилнинг шу даврига нисбатан 10 фоизга яқинни ташкил этди.

Шокиржон ТЎҒОНОВ,
Чирчиқдаги
«Электркимёсаноати» очиқ
акциядорлик жамияти
хизматчиси.



СУРАТЛАРДА: янги қўшма корхона цехларида.

ТАРИХ ВА ТАРАҚҚИЁТ

Тошкент давлат техника университетида «Ўзбек халқи ва давлатчилиги тарихи» республика илмий семинарининг 29-йиғилиши бўлиб ўтди. Фанлар академияси Тарих институти томонидан анъанавий тарзда ўтказиб келинаётган бу галги тадбир Ўзбек давлатчилиги тараққиёти тарихида фан ва техниканинг ўрнига бағишланди.

Анжуманда таъкидланганидек, Марказий Осиёда фан ва маданият ўрта асрлардаёқ тараққиётнинг юксак босқичига кўтарилган эди. Бундай юксалишга эришишда ижтимоий-иқтисодий омиллар билан бир қаторда ўша даврларда яшаб ўтган етуқ шахслар, буюк сиймоларнинг ўрни ва роли беқиёс бўлган.

Масалан, табобат илми ривожини Ибн Сино, табиий ва аниқ фанлар соҳасидаги

улкан кашфиёт ва ютуқлар Абу Райҳон Беруний сингари алломалар номи билан чамбарчас боғлиқ.

Фарбнинг машҳур тарихчиларидан бири жаҳонда Х-ХI асрлардаги фан тараққиётининг йилларни Беруний даври деб атаган. Бу бежиз эмас. Чунки, Абу Райҳон Беруний олим сифатида ўз илмий тажриба ва гоёлари билан нафақат шарқ, балки жаҳон илм-фани ривожига катта улуш қўшган.

Аллома геология соҳасида биринчи бўлиб қуруқликнинг силжиш назариясини, ер ости сувларини юзага чиқариш бўйича амалий фикрларни илгари сурган. Минералогия соҳасида маъданларнинг келиб чиқишига қараб хоссаларини ўрганиш, уларни қайта ишлаш, табиий конларни аниқлаш борасида қолдирган қимматли маълумотлари бугунги кунда ҳам аҳамиятлидир.

Семинарда минтақамизда қадимги давр ва ўрта асрларда ишлаб чиқаришнинг ривожига фан ва техниканинг ўрнига бағишланган маърузалар тингланди.

Баҳор ХИДИРОВА,
ЎЗА мухбири.

Қадрлайлик, қадр топайлик

ҲАР ХОНАДОНДА ШОДИЁНА

Вилоятнинг қайси маҳалласига бормайин, одамларни, албатта, қизгин тараддуд устида, байрам либосида, кўтаринки руҳда кўраман. Мана шунинг ўзи, республикамизнинг улкан ютуғидир. Меҳр ва мурувват йили Наврўзини алоҳида жўшқинлик билан нишонлаш учун жамғармамизнинг жойлардаги бўлимларига вазифалар белгиланди. Аввало маҳаллалардаги кам таъминланган оилалар, боқувчисини йўқотган ёлғиз қарияларни байрам муносабати билан йўқлаб, уларга ёрдам кўрсатаёلمиз. Ободонлаштириш ва кўккаламзорлаштириш икки ойлиги доирасида 13-14 мартда ўтказилган умумхалқ ҳашари ниҳоятда самарали ўтди. Наврўз арафасида жамғармамиз «Энг саранжом-сарипта оила», «Покиза хонадон» номинациялари бўйича кўрик-танлов ўтказди. Бундан мақсадимиз — жойлардаги майдон ва кўчалар, хонадонлар тозалиги, озодагарчиликни таъминлаш. Танлов шартига кўра, умумхалқ ҳашарида «Маҳалла» жамғармаси туман ва шаҳар бўлимлари вакиллари хонадонларнинг покизагини, саранжом-сарипталигини кўриб, голибликка бир неча номзод белгилайди ва Наврўз байрами куни улар ичидан энг муносиблари танлаб олиниб, ҳокимлар томонидан тақдирланади. Албатта, голибларга муносиб совғалар тайёрлаб қўйилган.

Жойларда байрам шодиёналари доим ўзига хос нишонланади. Хусусан, Тошкент туманидаги «Шамсиобод» маҳалласи бундай халқ байрамларини қанчалик тантанали, мазмунли ўтказишини айтиб ўтмаслик мумкин эмас. Маҳалла фаоллари бир ёқадан бош чиқариб ҳаракат қиладилар. Қозонларда Наврўз таомлари пиширилиб, маҳалла аҳлига тортилади.

Вилоятимиздаги 2445 маҳалланинг ҳар бирида шундай тадбирлар ўтказилапти.

Тўлқин МИРКОМИЛОВ,
«Маҳалла» жамғармаси Тошкент вилояти бўлимининг раиси.

НАВРЎЗНИНГ НАВРЎЗАСИМАН

Мен Наврўз куни дунёга келганман. Шунинг учун ҳам бизнинг уйимизда бу сана кўшалоқ байрамга айланиб кетади. Яқинларим, дўст-дўгонларим йиғилишади. Бу эса менга жуда ёқади. Улар билан мириқиб суҳбатлашамиз, ташвишларни унутиб, фақат яхшиликлар ҳақида гаплашамиз. Бу йил ҳам Наврўзга оиламиз билан алоҳида тайёргарлик кўраёلمиз. Шу куни қариндошлар билан дош қозонда сумалак пишироқчимиз.

Бу гапларни нима учун айтаяпман? Қариндош-уруғлар ёру биродарлар учрашиб, бир ерда дийдорлашсалар, ўртадаги меҳр-оқибат ришталари узилмайди, ҳеч ким бир биридан узоклашмайди.

Шоир Навоий айтганларидек: **Дунё шодликлари йиғилса буткул,**

Дўстлар дийдоридан туролмас устун.

Ҳеч қачон қалбимизни меҳр-мурувват, оқибат тарк этмасин.

Наврўза АЪЗАМОВА,
Зангиота тумани.

— Қаерга борманг — тўйгами, байрамгами, чойхонагами — отахонлар давранинг тўридан жой олишади. Улар доим давлатимиз томонидан ҳам, халқимиз томонидан ҳам эъзозланадилар. Ёки бўлмаса бирон бир ишни бошлашдан олдин нурунийларни чақириб, улардан фотиҳа олишади. Мен нима демоқчиман? Меҳр ва мурувват мана шундан бошланади. Яъни, давлат, халқ фахрийларни эъзозладими, уларни оилада ўз ўрни бўлади. Фарзандларига ҳам доим ижобий насиҳатлар бериб, яхши йўл сари етаклашади. Натижада униб, ўсиб келаётган авлод қалбидан меҳр, оқибат деган тўйғу жой олади.

МЕҲР КУНДА КЕРАК

Республикамизда ҳар йили ўзига хос тарзда нишонланаётган миллий байрамимиз арафасида жамғармамиз ўз тадбирларини ишлаб чиқиб, жойларга тавсия этган. Ҳаммага маълум, уни амалга ошириш учун ҳомийлар ёрдамига доим таяниб келамиз. Улар ёрдами билан ёлғиз қарияларга совға-саломлар, озиқ-овқат маҳсулотлари тарқатилади. Тўғри, гап фахрийларимизга бераётган инъомларимизнинг катта-кичиклигида эмас. Уларнинг ҳол-аҳволидан хабар олиб, кўнгилларини сўрасак, ана шу нарса уларни кўпроқ хурсанд қилади. Айниқса, бундай йўқловларни ана шундай арафаларда уюштирсак, инсоннинг дилида байрам нафаси барқ уради.

Ҳар биримиз ҳеч қачон ширин, дилкаш сўзларимизни бир-биримиздан аямайлик.

Нўмон НАСИМОВ,

«Нуруний» жамғармаси вилоят кенгашининг раиси.



ЁШЛАР — КЕЛАЖАГИМИЗ

Ёшлар йилдан йилга улғайиб, камолга етиб, ўзларининг ижобий фазилатларини кўпроқ намён қилмоқдалар. Байрам ёки тўй-ҳашамларда бирон-бир вазифани ўдаласам, деган ғайрат ич-ичига сиғмайди уларнинг. Мана шундай пайтда ҳар қандай топшириқ берилса, меъёрига етказишади, ўдалашади.

Айни кучга тўлган ёшлар ўз саъй-ҳаракати билан тезроқ халқ эътиборини қозонсам, ҳурмат топсам, дейди. Шунинг учун ҳам, ташкилотимиз ўтказиладиган Наврўз байрамида турли халқ, спорт ўйинларини ташкил этади. Зеро, йиғит ва қизларимиз танловларда, баҳс-мусобақа ва беллашувларда иштирок этиб, одамлар назарига тушсин. Тўғри, уларда иштирок этган ёшларимизнинг ҳаммаси ҳам голиб бўлавермайди, лекин бошқа тенгдошлари қатори кейинги байрамда, келаси йили голибликни қўлга киритиш учун интилади, изланади. Биласиз, ёшларнинг ғайрати, шижоати чексиз. Агар уларни бирор-бир машғулот билан банд қилмасангиз, ножўя ишларга

қўл уриб, кўнгилсиз хатти-ҳаракатларни бошлашлари мумкин. Бундай нохушлик рўй бермаслиги учун уларнинг куч-ғайратини тўғри йўлга сола билишимиз керак. Кўзда тутилган ўйинларга келадиган бўлсак, «Қувноқлар ва зукколар», «Заковат» каби ўйинларга ўхшаш кўрик-танловлар, арқон тортиш, варрак учуриш, чавандозлик сингари ажодларимиздан бизга мерос миллий ўйинлардир. Мана шу тадбирларга жойлардаги ёшларни жалб қила олсак, мақсадимиз сари бир қадам олға юрган бўламиз.

Диёр АЛИМОВ,

«Камолот» ёшлар ижтимоий ҳаракати вилоят кенгаши раиси вазифасини бажарувчи.

ҲЕЧ КИМ ЧЕТДА ҚОЛМАЙДИ



Халқимизнинг севимли байрами — Наврўз миллий қадриятимиз, урф-одатларимиз ва маросимларни қадрлаш, тиклаш билан бир қаторда дўстлик, биродарлик, яқдиллик ҳамда меҳр-оқибат, имон каби фазилатларни шакллантиришда муҳим аҳамият касб этади. Бу байрамнинг ўтказилиши қадимда катта тарбиявий кучга эга бўлган. Шу боис шарқ халқлари, жумладан, бизнинг ажодларимиз ҳам ушбу айёмни минг йиллар давомида ардоқлаб келишган. Вилоятимиз аҳолиси ҳам меҳр-мурувват, гўзаллик рамзи бўлган Наврўзни зўр кўтаринки руҳда қарши олмақдалар.

Жамғармамиз ҳам бундай байрамнинг тарбиявий аҳамиятини эътиборга олиб ҳамда вилоятда ушбу умумхалқ байрамига пухта тайёргарлик кўриш ва уни юксак савияда ўтказиш мақсадида вилоят ҳокими томонидан қабул қилинган қарорнинг ижросини таъминлаш мақсадида бир қатор тадбирлар ишлаб чиққан бўлиб, шу асосда иш олиб борилмоқда. Вилоятимиз бўйича 262 та жойда асосий байрам тадбирлари ўтказиш режалаштирилган. Мана шу тадбирларга жамғарма томонидан баҳоли қудрат ёрдам бериш ҳам кўзда тутилган. Шунингдек, байрам муносабати билан

урф-одатларимизга кўра сумалак, ҳалим каби тансиқ таомлар тайёрланиб, кам таъминланган оилалар, болалар, қариялар уйларига, ногиронларга тарқатиш режалаштирилган. Зеро, бундай меҳр ва мурувват байрамида ҳеч ким меҳр тўла кўзларнинг саховатидан четда қолмасин.

Наврўз байрамида ҳар бир фуқаро ўйнаб-кулиб, шоду хуррамлик билан иштирок этсин. Ҳар бир кунимиз мана шундай кўтаринки руҳда ўтаверсин.

Муҳаббат ШОЮСУПОВА,
«Наврўз» халқаро хайрия жамғармаси вилоят бўлимининг раиси.

МАҲАЛЛА МИННАТДОР

Республикамиз пойтахтининг Собир Раҳимов туманидаги Мискин маҳалласида Наврўз байрами олдида маданий-маърифий тадбир бўлиб ўтди. Маҳалла тўйхонасида катта дастурхон ёзилиб, унинг атрофида уч юз нафардан ортиқ фахрийлар жой олдилар. Наврўз байрами, йилимизнинг Меҳр ва мурувват йили деб эълон қилинишининг аҳамияти ва моҳияти ҳақида қисқача суҳбат бўлди. Унда республика «Нуруний» жамғармаси, бошқа жамоатчилик ташкилотлари вакиллари ёрдамга муҳтож кексаларга, оилаларга совға-саломлар тарқатишди. Маҳалладаги кам таъминланган икки оила фарзандларининг суннат тўйлари ҳам тантананага қўшилиб кетди. Улар номига банкка пул қўйилди. Бир гуруҳ санъаткорлар ва хаваскорлик дасталари ижросидаги куй-кўшиқлар, аскиялар тадбирнинг янада файзли ўтишини таъминлади. Маҳалла аҳолиси бу тадбирни уюштиришда ҳар томонлама ёрдам кўрсатган Эргаш Фуломов бошчилигидаги ҳомийларга миннатдорлик билдирди.

Ўзбекистон — умумий уйимиз

ЯКДИЛМИЗ, ҲАМЖИҲАТМИЗ

Ўзбекистондаги ҳар қандай шодиёна шу заминда яшовчи миллатлар вакиллари томонидан бирдек нишонланади. Хусусан, Наврӯз айёми ҳам бутун Ўзбекистон халқи учун умумхалқ байрамидир.

Бизнинг Ангрен шаҳридаги рус миллий маданий марказида ҳам ҳар йили баҳор байрами кўтаринки руҳда ўтказилади. Рус миллатининг миллий аъноалари ва қадриятлари билан уйғунлашиб кетган танталарда турли миллатдан иборат ангренликлар иштирок этиб, ҳордиқ чиқарадилар.

Бу йил ҳам баҳорнинг яшариши ва янгиланиш айёми — Наврӯзни ўзгача бир тарзда кутиб олишни кўзлаб турибмиз. Хусусан, рус тилида билим берувчи умумтаълим мактаблари ва миллатимиз вакиллари меҳнат қиладиган ташкилот ва муассасаларда уни кенг нишонлаш режалаштирилган, ҳозирда барча тайёргарлик ишлари ниҳоясига етди.

Наврӯзни меҳр-мурувват, саховат, эзгулик байрами ҳам дейишади. Шу мақсадда миллий маданий марказимиз аъзолари ва Россия давлатининг юртимиздаги ваколатхонаси билан келишган ҳолда шаҳардаги умумтаълим мактабларидаги кам таъминланган оилалар фарзандларига моддий ҳамда маънавий ёрдам кўрсатишни мўлжаллаганмиз.

Яқинда бир дастурни амалга оширишга киришмоқчимиз. Яъни республикадаги рус таълим мактабларида тарих ва ҳуқуқ фанлари соатини кўпайтириш ва бу бўйича мутахассислар малакасини ошириш масаласи дастурдан жой олган.

Марказимиз ташаббуси билан 25 нафар мактаб ўқувчиси Омск вилоятида ҳордиқ чиқариб қайтдилар. Шунингдек, уруш ва меҳнат фахрийларини ҳам санаторий ва профилакторийларга юбормоқдамиз.

Шу ва бошқа амалга ошираётган ишларимизда юртимиздаги қатор миллий маданий марказлар билан ҳам ҳамкорликни йўлга қўйганмиз. Албатта, бу ўз самарасини бермоқда. Хусусан, ўзга миллатлар аъноалари, қадриятлари, санъати ва маданиятини ўрганишда муҳим омил бўлмоқда.

Бу йилги Наврӯз байрамини ҳам Ангрен шаҳридаги ўзга миллат миллий марказлари билан ҳамкорликда нишонлаймиз. Уйлаймизки, байрам биз кутгандан ҳам кўтаринки руҳда ўтади.

Люция РЕБЕЧЕНКО,
Ангрендаги рус миллий маданият маркази раҳбари.

ДЎСТЛИК ҚАНОТИДА

Миллатидан қатъи назар, мамлакатимизда яшаб турган ҳар бир бола — Ватан фарзанди. Шу боис уларни билимли, иқтидорли, барқамол инсонлар қилиб тарбиялашга алоҳида эътибор қаратилмоқда. Ўғил-қизларимиз рус, инглиз, немис, француз ва бошқа тилларни мукаммал ўрганиб ўсишлари, умуминсоний қадриятларни чуқур ўзлаштириб олишлари учун вилоятимизда ҳам етарли шароитлар яратилмоқда.

Бизнинг Бекободни дўстлик, биродарлик шаҳри дейиш мумкин. Мамлакатимизда ягона металлургия корхонаси, йирик цемент заводи, бошқа ишлаб чиқариш қувватларини барпо этишда ўнлаб миллат фарзандлари елкама-елка туриб меҳнат қилишган.

Бугун шу аъноа давом этиб

келаяпти. Ўзбек ва тожик, рус ва украин, татар ва қозок, қирғиз ва корейс... миллатларининг ўғил-қизлари кекса авлод тажрибаси-

га таяниб, мустақил Ўзбекистон иқтисодийтини ривожлантиришга муносиб ҳисса қўшувчи фарзандлар бўлиб етишмоқдалар.



Мана, бизнинг электрда пўлат эритиш цехини олинг. Турли миллат ўғлонлари ёнма-ён туриб эритаётган пўлатимиз Ватан иқтисодий қудратини оширишга хизмат қилмоқда. Ҳамкасбларимиз Евгений Белов, Баҳодир Юсупов ва бошқалар билан маҳсулот сифатини яна ҳам яхшилаш, унинг ҳажмларини ошириб бориш учун тинмай илзанаёмиз.

Абдурахмон АБДУРАЗЗОҚОВ,
Ўзбекистон Қаҳрамони.
Еркебой БОТИРОВ олган суратлар.

МУРУВВАТ ФАСЛИ

Наврӯз нафақат баҳор, яшариш, балки меҳр-мурувват, хайру саховат байрами ҳамдир. Қадимдан шу кунни гина-қудуратлар унутилиб, ёлғизлар, боқувчисини йўқотган қариялар ҳамда ногиронлар ҳолидан хабар олинган. Уларга меҳр саховат кўрсатилган.

Ўзбекистон Республикаси Мудофаа вазирлиги, Тадбиркорлар ва ишбилармонлар ҳаракати — Ўзбекистон либерал-демократик партияси билан ҳамкорликда Тошкент шаҳридаги бешта

меҳрибонлик уйининг олти юзга яқин тарбияланувчисига атаб «Наврӯз — мурувват фасли» деб номланган хайрия концерти уюштирди. Пойтахтимиздаги «Марказий офицерлар саройи» да бўлиб ўтган тадбирда болаларга минглаб сўмлик спорт анжомлари туҳфа этилди.

Қуроли кучлар Марказий ашула ва рақс ансамбли ҳамда таниқли ёш хонандалар ижро этган куй-қўшиқлар болажонларга манзур бўлди.

Ў.А.

УМИД БИЛАН ТАРБИЯЛАЯПМИЗ

Узлуксиз таълим-тарбия дастури асосида ўқувчи ёшлар билим ва кўникмаларни эгаллар эканлар, улар ижтимоий ҳаётнинг турли соҳаларида ўз ўринларини мустаҳкам топадилар. Бунда, албатта, педагог-кадрлар малакаси, тажрибаси асосий ўрин тутлади.

Бу жараёнда турли миллат вакиллари билан 11-мактаб кимё ўқитувчиси Елизавета Ким, 16-мактаб география ўқитувчиси Татьяна Огай, 6-мактаб психологи Лариса Бажмина каби ўнлаб касбдошларимиз таълим билан бирга ўқувчиларда қардошлик, дўстлик муносабатлари шаклланишига ҳисса қўшмоқдалар. Ёшлар билан қардош халқларимиз урф-одатлари, маданияти, тарихи борасида қизиқарли суҳбатлар олиб боришади.

Ушбу нишонланаётган баҳор айёми ҳам

умумхалқ азалий байрамимиздир. Унинг ўзига хос тарбиявий жиҳатлари борки, биз ундан маънавий, маданий озуқа оламиз.

Ўқувчи ёшлар орасида иқтидорли ва қобилиятли ўқувчиларни аниқлаш, қўллаб-қувватлаш, улардаги ноёб фазилатларни янада ривожлантириш асосий вазибаларимиздан ҳисобланади. Мустақиллик йилларида туғилган болаларда эркинлик, Ватанпарварлик тушунчалари ўзгача бир беғуборлик, теранлик ва қатъиятлик билан шаклланиб бормоқда.

Бугун биз катталарнинг эзгу орзу-ниятларимизни кўз-кўз қилиб улғайётган, жисман ва маънан соғлом ўғил-қизлар буюк бунёдкорлик ишларимизда албатта мадад бўлажак.

Динара ИСАМОВА,
Олмалик шаҳридаги 17-умумтаълим мактабининг тарих ўқитувчиси.

Огоҳ бўлаёлик

Бугун болаларнинг чехраларида ўзгача бир қувонч. Улар шу кўклам кунлари оталари ва оналари, опалари ва акалари билан бирга Наврӯзни нишонлашга чиқиб, ўзларини шу қудратли юртнинг навқирон фарзандлари — эртанги кун эгалари деб ҳис қила бошлайдилар.

Ширин суҳбат қураётган оқсоқолларнинг чехраларига бир нигоҳ ташланг. Улар сайлгоҳ ва боғларда, соясалқин чорпойларда ўтириб, ўтган кунларни эслашмоқда, бугунги кунларнинг шукронасини қилишмоқда.

— Мана, юртимизга яна Наврӯз кириб келмоқда, — дейди қариялардан бири, вазминлик билан салмоқланиб. — Биз бу байрамни ҳар йили эркин-эминликда, бахтимиздан қалбларимиз қувончга тўлиб нишонламоқдамиз.

ТИНЧЛИГИМИЗГА КЎЗ ТЕГМАСИН

Бу дилкаш суҳбатларни тинглаб туриб, беихтиёр Президентимизнинг тинчлик, хотиржамлик, баҳамжиҳатлик ҳақидаги сўзларини эслаймиз. Халқимизнинг истаги битта, дейди ҳамиша Юртбошимиз, осмонимиз тинч ва мусаффо бўлсин. Мен Яратгандан халқимга тинчлик, сихат-саломатлик тилайман. Бу табаррук заминимизда

яшаётган ҳар бир инсон бахтли ҳаёт кечиршига, тинч, осуда кунларнинг суруридан баҳраманд бўлишга ҳақлидир.

Биз ҳамиша ўз хонадонларимизда, қишлоқ ва шаҳарларимизда, бутун мамлакатда тинчлик, хотиржамлик, биро-

дарона барқарорлик, баҳамжиҳатлик устувор бўлишини истаймиз. Оилаларимизга ғам-алам ва кўз ёшлари олиб келишга интилувчи кучларни жиловлаш, ўз тинч ҳаётимизни ҳимоялаш учун хушёрлик кўрсатишимиз лозим.

Шу кунларда жаҳоннинг турли мамлакатларидан олиб берилаётган телекўрсатувларда, газета ёки радио ха-

барларида террорчиларнинг ваҳшиёна хатти-ҳаракатлари келтириб чиқараётган вайронагарчилик, ғам-алам лавҳалари ҳар бир соф виждонли кишиларнинг қалбини ўртмаслиги мумкин эмас. Тўғри, Испания биздан жуда

олисда. Чеченистон ҳам узоқ. Ироқ қанча-қанча тоғу чўллар ортида. Лекин, мамлакатимиз оммавий ахборот воситаларида эълон қилинган маълумотларни ўқиган киши ўша портлашлар, беғуноҳ жароҳатланган кишиларнинг кўз ёшларини кўнглига яқин олмаслиги мумкин эмас. Яқинда ҳокимият идораларига авф сўраб мурожаат этган собиқ террор-

чилардан бирининг эътирофлари ҳам шу кунларда жаҳонда юз бераётган кўпорувчилик ҳаракатлари биздан унчалик олис эмаслигини эслаиб қўйди.

Биз мустақил Ўзбекистонда яна бир Наврӯзимизни кутиб олмамоқдамиз. Осмонимизда қора булутлар ҳеч қачон пайдо бўлмасин.

Бунга эришиш ҳар биримизнинг қўлимизда. Ҳар биримиз тинчлик, хотиржамликни асраб-авайлаш йўлида огоҳ бўлишимиз, ҳуқуқ-тартиботни муҳофаза қилувчи ходимлар, маҳалла посбонларига елкадош, кўмакдош бўлишимиз керак.

Муродхон ФАЙЗИЕВ,
Зангиота туманидаги «Маданият» маҳалласи оқсоқоли.

Акциядорлик-тижорат

«РАХТА BANK» НИНГ

Тошкент вилояти бошқармаси

ВИЛОЯТ АҲОЛИСИНИ

Наврӯз

байрами билан муборакбод этади.

Наврӯз шарофати билан уйғонган баҳорий хуш кайфият, эзгу орзу-тилаклар йил бўйи сизларни тарк этмасин.

Наврӯз – халқимизнинг бағрикенглик, саҳийлик, меҳр-мурувватлилик каби гўзал фазилатларини намоен этсин.

Шу мақсадлар йўлидаги хайрли ишларингизда, саъй-ҳаракатларингизда ҳамиша банкимизнинг доимий кўмаги ва иштирокига умид боғлашингиз мумкин.

Омад сизга ёр бўлсин!

Ўзбекистон банклари рейтинги

«Ахбор-рейтинг» банклараро рейтинг компанияси (БРК) хабар беришича, 2003 йил якунлари бўйича навбатдаги рейтингда Ўзбекистоннинг 28 тижорат банки иштирок этди.

«Ахбор-рейтинг» БРК республика тижорат банклари ишини баҳолашнинг янги услубиятини ишлаб чиқди. Ушбу услубият халқаро стандартларга асосланган бўлиб, банклар молиявий фаолиятини ўрганишда қатъийроқ талабларни қўяди.

Агар аввалги рейтинглар молиявий фаолият кўлами, сармоянинг етарлилиги, ликвидлик ва даромадлилик каби тўрт кўрсаткичга қараб гуруҳларга бўлинган бўлса, бу галги тасниф «Кўлам», «Рентабеллик», ва «Ишончилилик» каби кўрсаткичларни ўз ичига олади.

Йирик банклар орасида кўлами бўйича ўринлар шундай тақсимланди: биринчи ўринда – «Пахта-банк», иккинчи ўринда – «Асака-банк», учинчи ўринда – «Ўзсаноатқурилишбанк».

Ўрта банклар гуруҳида биринчи ўринни «Савдогарбанк», иккинчи ўринни «Ҳамкор-банк», учинчи ўринни «Ўзтадбиркорбанк» эгаллади. Кичик банклар ўртасида биринчи ва иккинчи ўринларни «Ўктам-банк» ва «DAVR-BANK» эгаллади.

Ишончилилик бўйича ўринлар куйидагича тақсимланди: йирик

банклар – олдинда «АБН АМРО банк», кейин «Асака-банк» ва «Ўзсаноатқурилишбанк». Ўрта банклар орасида «ЎТ-банк» пешқадамлик қилмоқда, ундан сўнг «Ўзприватбанк» ва «Бизнес-банк» жойлашган. Кичик банклар ўртасида биринчи ўринни «DAVR-BANK», иккинчи ўринни «Ўктам-банк» эгаллади.

Рентабеллик бўйича йирик банклар куйидаги ўринларни эгаллади: биринчи ўрин – «Галла-банк», иккинчи ўрин – «Пахта-банк», учинчи ўрин – «Ўзсаноатқурилишбанк». Ўрта банклар гуруҳида «Ҳамкорбанк» етакчилик қилмоқда, ундан кейинги ўринларни «Бизнес-банк» ва «Алоқа-банк» эгаллаган. Кичик банклар гуруҳида «DAVR-BANK» ва «Ўктам-банк» пешқадамлик қилмоқда.

Кичик банклар гуруҳида ўзгаришлар рўй берди, «Алп-Жамол банк», «Универсал-банк» ва «Капитал-банк» ўрта банклар гуруҳига ўтди. Бу банклар фаоллиги ортгани ва йириклашаётганини кўрсатади.

Жамшид РАУПОВ,
ЎЗА шарҳловчиси.

22 март - Халқаро обихаёт куну

Маълумотларга қараганда, сайёрамиздаги барча сув захираларининг атиги икки ярим фоизи ичишга яроқли ҳисобланади. Дунёнинг кўплаб мамлакатларида тоза ичимлик суви етишмаслиги ва санитария талабларига зид турмуш кечираётган минглаб инсонлар ҳаётдан кўз юммоқда.

СУВНИНГ ҲАР ҚАТРАСИ – ЗАР

Мамлакатимизда ичимлик сув таъминотининг саксон фоизи ер ости чучук сув манбалари ҳисобига тўғри келади. Аҳолининг қолган қисми дарё ва сойлар сувини истеъмол қилади. Ичишга яроқли чучук сув асосан етмиш етти манбага тўпланган.

Табиатни муҳофаза қилиш давлат кўмитаси ер ва сув манбаларидан оқилона фойдаланиш ва уларни муҳофазалаш бош бошқармасидан маълум қилишларича, мавжуд бундай чучук сув манбаларида ҳам обихаёт сифати ёмонлашаётгани кузатиляпти. Энг катта ер ости чучук сув захиралари Фарғона водийсидаги Сўх, Чимён-аввал, Бешариқ манбаларига йиғилган. Бу ерда ҳам сув ҳажми камайиб бораётгани аниқланган. Бунинг олдини олиш мақсадида ер ости чучук суви ҳосил бўладиган катта ҳудудларга алоҳида муҳофаза этиладиган табиий ҳудуд мақоми берилди.

Вазирлар Маҳкамасининг «1999-2005 йилларда Ўзбекистон Республикасининг атроф-муҳитни муҳофаза қилиш ишлари дастури тўғрисида»ги қарори бу борада муҳим қўлланма вазифасини ўтаётди.

Мазкур дастурда юртимиздаги ер ости ва очик сув манбаларини муҳофазалаш, обихаёт ифлосланиши ва камайиб кетишининг олдини олиш борасидаги энг долзарб вазифалар ўз аксини топган.

Дарёлар ифлосланишининг олдини олиш мақсадида кўплаб очик сув ҳавзалари, жумладан, Қашқадарё, Сурхондарё, Зарафшон ва Чирчиқ дарёларининг сувни муҳофазалаш минтақалари ва қирғоқбўйи полосалари белгиланди.

Корхоналарда табиатга безарар ишлайдиган технологияларни жорий этишга қаратилаётган эътибор туфайли биргина Тошкент вилоятида очик сув ҳавзаларига санат оқоваларини ташлаш кескин камайди.

Обихаётнинг ҳар қатрасини тежаб-тергашда давлат ва жамоатчилик назоратини янада кучайтириш муҳим аҳамият касб этади.

Инсон ҳаётида муҳим омил ҳисобланган обихаёт камайиши ва ифлосланишининг олдини олиш, ундан оқилона фойдаланишда аҳоли экологик маданиятини юксалтириш нафақат табиатни муҳофазалаш идоралари ва жамоатчилик ташкилотлари, балки барча фуқаролар зиммасига катта масъулият юклайди.

ЎЗА.

Биз ва жаҳон



ЯНА БИРГАМИЗ

Наврўз арафасида вилоят ҳокимлиги қошидаги «Ҳамдўстлик» клуби ташаббусига кўра, ғайриоддий учрашув бўлиб ўтди. Жаҳоннинг йигирмадан ортиқ мамлакатлари вакиллари мазкур тадбир меҳмони бўлишди. Уларнинг аксарияти хорижий ваколатхоналар ходимлари ва элчиларнинг рафиқалари эди. Меҳмонлар учун баҳор байрами моҳияти ҳақида ҳикоя қилувчи ажойиб дастур ташкил этилди.

Наврўз асрлар давомида халқимиз учун ардоқли ва мўътабар байрам бўлиб келган. Бугунги кунга келиб у Ўзбекистонда яшовчи барча одамлар учун

янги мазмун кашф этмоқда. Тадбир давомида меҳмонларга нафақат ушбу шодиёна ҳақида, балки у билан боғлиқ удумлар, фасл таомлари ҳақида гапириб беришди. Учрашувга ташриф буюрган турли мамлакат вакиллари вилоятимизда истиқомат қилаётган юздан зиёд миллат ва элатлар намоёндалари ҳудуддаги барча шаҳар ва қишлоқларда кўклам шодиёнасини бир хилда байрам қилажакларини эшитиб, завқланишди.

Учрашув ниҳоясида меҳмонлар учун Давлат тўқимачилик институти Либослар уйи томонидан охириги урфдаги кийим-

кечаклар термаси намоиш этилди. Ёрқин бўёқларга бой ўзбек хонатласи, адрас ва шойисидан мусаввирларнинг ижодий топилмалари сифатида дунё юзини кўрган бу ажиб либослар, улар намоиш қилинаётган қишқи боғнинг гўзал манзаралари меҳмонларни тамоман лол қолдирди.

Тадбирда вилоят ҳокимининг ўринбосари, хотин-қизлар қўмитаси раиси Адиба Аҳмаджонова қатнашди.

СУРАТЛАРДА: тадбирдан лавҳалар.

Еркебой БОТИРОВ олган суратлар.



Расмий ташриф арафасида

МУШТАРАК МАҚСАДЛАР ЙЎЛИДА

Тарихи ва маданияти қадим-қадимдан бир-бирига ўхшаш Ўзбекистон билан Озарбойжон ўртасидаги алоқалар равнақи ҳозир ҳам икки томон учун бирдай муҳимдир. Шу маънода Ўзбекистон раҳбарининг Озарбойжонга, Озарбойжон раҳбарининг Ўзбекистонга ташрифлари ҳар гал икки халқ ҳаётида муҳим воқеа сифатида қайд этилади.

Шу боис, Озарбойжон Президенти Илҳом Алиевнинг мамлакатимизга ташрифи ҳам мамлакатларимиз ўртасидаги муносабатларни ривожлантириш учун янги имкониятлар эшигини очади. Ўзаро ҳамкорликни сарҳисоб қилиш ва истиқболларини белгилаб олиш, сиёсату иқтисод бобида юзага чиқаётган янги мезонлар асосида борди-келдини мустақамлаш учун шундай ташрифлар зарурлиги табиий.

Мустақиллигини кўлга киритган янги давлатлар миллий инфратузилма яратиш, собиқ Шўро тузуми мерос қолдирган иллатлардан халос бўлиш, жаҳон иқтисодиётига интеграциялашиш каби аниқ мақсадлар сари қадам ташлади. Озарбойжон Республикаси танлаган йўл ҳам айна шу мезонлар билан ўлчанади. Озарбойжон халқи қийинчиликларга қарамай, бу йўлда учраган тўсиқларни собитқадмлик билан енгиб ўтмоқда.

Озарбойжон ҳам Ўзбекистон каби иқтисодий салоҳияти юқори мамлакатлардан ҳисобланади. Озарбойжон замини фойдали қазилмаларга бой, саноати ва қишлоқ хўжалиги яхши ривожланган. Хусусан, бу ўлка ёқилғи захиралари бўйича Форс кўрфазии мамлакатларидан қолишмайди. Бироқ мустақиллик бошида мамлакатда ҳукм сурган

беқарорлик ана шу имкониятларни тўла ишга солиш учун имкон бермади.

Шу ўринда бир фикр кўнгилдан кечади: халқимизда «бошидан ўтган табиб», деган нақл бор. «Тинчлик», «хотиржамлик» каби тушунчалар қанчалик азиз эканини бугун ҳар бир Озарбойжон фарзанди яхши ҳис қилади.

Икки мамлакат ўртасида сармоюларни ўзаро рағбатлантириш ва ҳимоялаш, солиқ, божхона, ҳаво, автомобиль ва темира йўл алоқалари, юк ташиш, сайёҳлик каби кўплаб соҳалар бўйича ҳамкорликка оид ўнлаб ҳужжатлар имзоланган. Айна пайтда

бу ҳужжатлар ҳаётда ўзининг амалий ижросини топаётгани мақсадларимиз муштараклигининг яна бир тасдиғидир. Мамлакатларимиз ўртасида ҳар томонлама алоқаларни кенгайтириш мақсадида икки давлат ҳукуматлараро қўшма комиссияси фаолият кўрсатмоқда. Ўзбекистон билан Озарбойжон халқаро майдонда ҳам турли халқаро ташкилотлар доирасида бир-бирига ҳамкор давлатлар ҳисобланади.

Халқларимизнинг маданий ҳамкорлиги қадим-қадимдан яхши ривожланиб келганини таъкидлаб ўтиш жоиз. Бу ҳамкорлик мустаҳкам пойдеворга эга.

Озарбойжон халқининг буюк сиймолари қолдирган маданий мерос халқимиз учун ҳам ғоят қадридир. Низомий, Фузулий асарларини ўзбек китобхонлари севиб муталаа қилади. Уларнинг ғазаллари-

ни санъаткорларимиз севиб куйлайди. Ўз навбатида, ўзбек халқининг буюк шоирлари қолдирган санъат дурдоналари озарбойжон халқи учун ҳам азиздир. Тарихга назар ташласак, Алишер Навоий Низомий Ганжавийни, Фузулий эса Алишер Навоийни устоз деб билган. Насимий ва Машрабдек халқчил шоирлар тақдирдош. Буюк адибимиз Мақсуд Шайхзода ҳам ўзбек, ҳам озарбойжон фарзандидир. Зеро, бу ҳамкорлик халқларимизнинг маданий меросини фақат бойитган, унга рангбаранглик бахш этган. Шу маънода Ўзбекистон ва Озарбойжоннинг буюк сиймолари қолдирган нодир асарлар икки халқнинг умумий мулки ҳисобланади.

Орзулари бир-бирига эш бўлган икки қардош халқ ўзининг фаровон келажagini қуришдек эзгу мақсадлар билан қадам ташламоқда. Бу йўлда ҳамжиҳатликда иш кўриш, албатта хайрлидир. Озарбойжон Президенти Илҳом Алиевнинг мамлакатимизга ташрифи халқларимиз ўртасидаги дўстлик ва ҳамкорлик алоқаларини янада кенгайтиришга хизмат қилиши шубҳасиз.

Сандмурод РАҲИМОВ,
ЎЗА шарҳловчиси.

Кобулда ҳашар

Илгари хабар қилинганидек, баҳорнинг дастлабки кунларида Ўзбекистон ҳукумати инсонпарварлик ёрдами доирасида Афғонистонга 11 минг туп дарахт кўчати юборган эди.

Кобулда Заҳириддин Муҳаммад Бобур боғига ушбу кўчатларнинг бир қисмини экиш бўйича ҳашар ўтказилди. Кобул шаҳри ҳокими М.Жангалак Ўзбекистон ҳукумати томонидан етказиб берилган дарахт кўчатлари учун миннатдорлик билдириб, кўшни ва биродар ўзбек халқи ҳамиша афғон заминида тинчлик ва ободончилик бўлишини истаб келганини алоҳида таъкидлаб ўтди.

Ҳашарда Афғонистон ўтиш ислом давлатининг қатор вазириликлари, Кобул шаҳри муниципалитети, дипломатик корпус раҳбарлари,

оммавий ахборот воситалари вакиллари қатнашди. Уруш йилларида хароб қолган келиб қолган боғнинг асосий ер майдонида 1250 туп дарахт, жумладан, 3 М.Бобур мақбараси атрофида 100 туп чинор кўчати ўтказилди.

– Дўст кўшнларимиз томонидан кўрсатилган ҳиммат барчамизда пойтахт Кобулни яқин келажакда қайтадан кўркам ва обод бўлишига умид билан қараш туйғуларини уйғотди, – дейди Кобул шаҳри ҳокимининг бош маслаҳатчиси доктор Соҳибназар Муродий. – Ишончим комилки, Афғонистон давлати ва унинг жафокаш халқи Ўзбекистон томонидан кўрсатилаётган ёрдамни ҳеч қачон унутмайди.

Тантанали руҳда ўтган ҳашар маҳаллий оммавий ахборот воситаларида кенг ёритилди.

“Жаҳон” АА.

Илмий-техникавий ҳамкорлик

Ўзбекистон Республикаси Вазирлар Маҳкамаси ҳузуридаги Фан ва технологиялар маркази директори, академик П.Ҳабибуллаев бошчилигидаги мамлакатимиз ҳаёти аъзолари Ҳиндистонда бўлишди.

Ҳиндистон ҳукуматининг Фан ва технологиялар департаменти, Техникавий билимлар академияси, Деҳли университетининг компьютер билимлари департаменти, Ядровий илмлар маркази, Генетик муҳандислик ва биотехнологиялар халқаро маркази, Ҳиндистон технология институтининг ҳамда бошқа қатор муассаса ва марказларда ўзаро ҳамкорлик алоқаларини чуқурлаштириш юзасидан амалий музокаралар ўтказилди. Ташриф давомида фан ва технологиялар соҳасидаги робиталарнинг ҳозирги ҳолати атрофлича таҳлил этилиши баробарида уларнинг кўламини кенгайтириш билан боғлиқ масалаларга алоҳида аҳамият қаратилди.

Мазкур учрашувларнинг самараси ўлароқ, Ўзбекистон Республикаси Вазирлар Маҳкамаси ҳузуридаги Фан ва технологиялар маркази ҳамда Ҳиндистон ҳукумати Фан ва технологиялар департаменти ўртасида “2004-2006 йиллар давомида фан ва технологиялар соҳасидаги таҳлил этилиши баробарида дастури” имзоланди. Ушбу ҳужжатда илмий-техникавий ҳамкорликнинг асосий йўналишлари, мутахассислар алмашиш, малака ошириш тадбирларини уюштириш, илмий анжуманларда икки мамлакат мутахассисларининг иштирокини таъминлаш билан боғлиқ муҳим масалалар ўз ифодасини топган.

Шухрат УМИРОВ,
“Жаҳон” АА, Деҳли.



АЗИЗ ВАТАНДОШЛАР ВА ЮРТИМИЗ МЕҲМОНЛАРИ!

*Сизларни баҳор ва янгилашиш байрами —
Наврўзи олам билан чин қалбдан
табриклаймиз.*



*Байрам
шодиёнаси
юртимизнинг
ҳар бир
хонадонига
тинчлик,
фаровонлик,
бахт-саодат,
қут-барака
келтирсин.
Айёмингиз
муборак, азиз
юртдошлар!*

«RESPUBLIKA KO'CHMAS MULK BIRJASI TOSHKENT VILOYATI BO'LIMI» MCHJ

ТОШКЕНТ ВИЛОЯТИ ЎРТА МАХСУС, КАСБ-ХУНАР ТАЪЛИМИ БОШҚАРМАСИ ТАНЛОВ ЭЪЛОН ҚИЛАДИ

Тошкент вилояти ўрта махсус, касб-хунар таълими бошқармаси Ўзбекистон Республикаси Вазирлар Маҳкамасининг 2001 йил 4 октябрдаги 400-сонли «Ўрта-махсус касб-хунар таълими муассасалари учун педагог кадрлар тайёрлаш тизимини такомиллаштириш чора-тадбирлари тўғрисида»ги қарорига биноан куйидаги академик лицей ва касб-хунар коллежларининг директори лавозимига танлов эълон қилади:

1. Бўстонлик тумани Фазалкент академик лицейига
2. Бўстонлик тумани Товоқсой иқтисодиёт касб-хунар коллежига
3. Паркент тумани қишлоқ хўжалик касб-хунар коллежига
4. Куйичирчиқ тумани қишлоқ хўжалик касб-хунар коллежига
5. Янгийўл шаҳар маиший хизмат кўрсатиш касб-хунар коллежига
6. Оққўрғон тумани қишлоқ хўжалиги касб-хунар коллежига
7. Оққўрғон тумани уй-жой қурилиши ва коммунал-хўжалик касб-хунар коллежига

Танловда иштирок этиш хоҳишини билдирган номзодлар куйидаги хужжатларни тақдим этадилар:

1. Бошқарма бошлиғи номига ариза
2. Шаҳар (туман) ҳокимиятидан тавсиянома
3. Сўровнома
4. Таржимаи ҳол
5. Маълумоти ҳақидаги хужжат ва унинг ксеронусхаси
6. Илмий даражаси ва илмий унвонлари ҳақидаги хужжатлар ва уларнинг ксеронусхаси (мавжуд бўлса)
7. Илмий-услубий ишлари ва ихтиролари рўйхати (мавжуд бўлса)
8. 4x6 ўлчамдаги фотосурат (6 дона)
9. Номзоднинг таълим муассасасига раҳбарлик фаолияти бўйича ихтиёрий шаклда ёзган режаси (концепция)
10. Ҳарбий гувоҳноманинг ксеронусхаси
11. Паспортнинг ксеронусхаси (турар-жойи билан)

Хужжатлар эълон чикқан кундан бошлаб 45 (қирк беш) кун давомида қабул қилинади.

**Манзил: Тошкент вилояти, Қибрай тумани, Геофизика кўрғони.
Телефонлар: 66-09-59, 66-16-51.**

«ИСТИҚБОЛ»

очиқ акциядорлик жамияти
акциядорларнинг навбатдан ташқари умумий йиғилиши ўтказилишини маълум қилади.

Йиғилиш 2004 йилнинг 21 апрель куни соат 10.00 да «Истиқбол» ОАЖ-нинг Паргос кўрғонидаги биносиди очилади.

Кун тартиби:

1. Қимматбаҳо қоғозлар чиқарилишини бекор қилиш ва акциядорлар билан ўзаро ҳисоб-китобни амалга ошириш.
2. «Истиқбол» масъулияти чекланган жамият таъсис хужжатларини тасдиқлаш.
3. Бошқа масалалар.

«SHIRIN OMAD» хусусий фирмаси мулкчилик шакли масъулияти чекланган жамиятга
ЎЗГАРТИРИЛАДИ.

Шикоят аризалари 1 ой ичида қабул қилинади.
Тел: 161-11-92.

Тошкент шаҳар темир йўл тиббиёт билим юрти томонидан 1991 йил 29 июнда Нелля Иосифовна Давидова номига берилган ПТ-1 067023 рақамли диплом йўқолганлиги сабабли

БЕКОР ҚИЛИНАДИ.

Ҳамма қулайликларга эга бўлган 4 хонали уй
СОТИЛАДИ.

Машина учун йўлак йўқ. Т. 54-87-28.

1997 йил 11 июнда Арзигуль Хаджимухаммедовна Аметова номига берилган 15-03 № 398 рақамли муваққат далолатномаси йўқолганлиги сабабли
БЕКОР ҚИЛИНАДИ.

Гушан

ЙЎҚДИР АРМОНИМ

Бағишлов

Ассалом, Наврўзим, навбахоримсан,
Ўзлим, миллатим, ифтихоримсан.
Гурурга, шарафга тўлиб тошганим,
Вилоятим, фахрим, гўзал Тошканим!

Узатсанг, кафтингда оқ қорли тоғлар,
Бўстонлик, Чимёнинг очар қучоқлар.
«Буюк Ипак йўли» узра карвоним,
Вилоятлар ичра ўзинг сарбоним!

Оҳангарон, Бўзсув, Чирчиқ дарёси,
Бободехқонларнинг борлиқ дунёси.
Кумушкенту Оқтош — дардга дармоним,
Кучоғинг гулмакон, йўқдир армоним!

Туркистон, Курама осмонга туташ,
Мардуми меҳнаткаш, меҳмондўст, дилкаш.
Парикент қизлари моҳитабоним,
Мақтовига лолдир тилу забоним!

Донғи дунё қадар Чиноз, Янгийўл,
Зангиота дуога очиб турар қўл.
Бўка, Бекободим, жону жаҳоним,
Сизларни мақташга келди замоним!

Қадим Дўстободда дўстлар жамул-жам,
Қардошлар бир сафда ташлайди қадам.
Оққўрғону Пскент ғаллага коним —
Тоғ каби пахтадан уйган хирмоним!

Азим бир маъвосан, мўътабар, мумтоз,
Васфингни ҳар қанча таъриф этсам оз!
Яшариб-яшнаган боғу бўстоним —
Сенга армуғондир шеъру достоним!

Алижон АЗИМОВ.

АЗИЗ МЕҲМОН

Карвонлар ортидан карвон келади,
Кўҳна тарихингни элар билади,
Меҳр-мурувватни диллар билади,
Дилларни хуш қилдинг, Наврўзи олам!

Ариқ бўйларида яшил майсалар,
Мудроқ кўзларини очар новдалар.
Баҳор кенгликларинг гўзал нақадар,
Дилларни хуш қилдинг, Наврўзи олам!

Турналар саф тортиб келар ўлкамга,
Не етсин шунчалар кўркам кўкламга,
Замин уйғонмоқда завқли оламда,
Дилларни хуш қилдинг, Наврўзи олам!

Қалдирғоч қувончдан куйлайди ҳалак,
Гулни соғинганча учар капалак,
Зулфига сочбаргак таққан эй малак,
Дилларни хуш қилдинг, Наврўзи олам!

Дошқозон атрофи тўла момолар,
Дуога қўл очиб, турган боболар,
Хаттоки юлдузлар кийган қаболар,
Дилларни хуш қилдинг, Наврўзи олам!

Кўк ялпиз, сомса-ю, тандир-тандир нон,
Бошқачадир бугун файзли дастурхон,
Ўлкамга хуш келдинг, эй азиз меҳмон,
Дилларни хуш қилдинг, Наврўзи олам!

Шоира ҚУРБОНОВА.

Шаҳноза ҳаётга меҳр билан қарайди. Табиати, борлиқни севиб, ардоқлайди. Унинг қалбидаги орзу-умидлари, дунёга бўлган нуқтаи назарини мана шу қайноқ туйғулар орқали ифодалайди. Ана шундай изланиш, иқтидор, билимга чанқоқлик туфайли Паркент туманидаги мактабнинг 11-синф ўқувчиси Шаҳноза Шожалилова 2004 йилнинг Зулфия номидаги Давлат

мукофоти совриндорлари орасидан жой олди. Байрам арафасида яна бир хушxabар олдик. «Ижод дунёси» нашриёт уйи томонидан унинг «Туйғулар» илк шеър ва ҳикоялар тўплами нашр этилди. Биз паркентлик ижодкор қизимизни юксак мукофот билан яна бир бор қутлаб, унинг ижодидан намуналарни эътиборингизга ҳавола этаймиз.



БАҲОР

Чорбоғлар чирой очиб,
Ҳар гул хуш бўй таратар.
Сувга сирларин айтиб
Бош эгади мажнунтол.

Том устида қизғалдоқ,
Кўйлаги ловуллаиди.
Қирга чиқсанг, бойчечак,
Мени ол, деб имлайди.

Ариқ четида ялпиз
Нафасида қўшиқ бор.
Ҳар ёнда анвойи ис -
Мунча сулувсан, баҳор!

ЗАВҚЛИ ЧОҒЛАР

Кўклам қирга ёйди гилам,
Рақс бошлади қизғалдоқлар.
Адирларнинг бағрида ҳам
Сайил қизир,
Завқли чоғлар

Момом катта қозон осди,
Сумалак хўб қутлуғ таом.

Тонггача қўшиқлар айтдик,
«Эл тинч бўлсин» дейди момом!

Борлиқ худди келинчакдай,
Кўзлар яшноқ, орзулар мўл.
Қадим айёмдир Наврўзой,
Бу кун ғам чекма,

ўйнаб-кул!

Кичик ҳикоя

Гулнора телефонда аллаким билан гаплашиб гўшакни жойига қўйдию, бир зум уйлашиб қолди.

— Ҳа, тинчликми? — деб сўради ишга отланаётган эри.

— Дадам бетоб бўлиб қолибдилар. Қизиқ, нима қилсамикин? Сиз ишдан қайтишда бирров хабар олиб келақолинг. Мен ишдан кейин Шаҳлонинг боғчасига — оналар йиғилишига боришим керак?!

— Ия, бизнинг идорада ҳам бугун мажлис бор-ку, — деди эри.

Эру хотин «Нима қилсак экан-а?» дегандек бир-бирига қараб қолишди. Сумкасини

елкасига осиб, туфлисини кияётган Нодир уларнинг суҳбатини эшитиб, жилмайиб қўйди.

Кечқурун ота ишдан қайтганида она қизалогини бағрига босганча хомуш утирарди.

— Сизга нима бўлди? — деди у.

— Нодир ҳалигача мактабдан қайтгани йўқ.

— Нега? Балки ўртоқлариникидадир, — деди ота.

— Ҳаммасиникидан сўроқладим. Уларникида йўқ, — деди она.

Вақт ўтиб борар, кечки овқатга ўт ёқилмаган, телевизор қўйилмаган, ташқарида эса

ёмғир ёғар, буларнинг бариси уйга аллақандай ваҳима олиб кираётгандек эди.

Кечки соат тўққизга яқин эшик қўнғироғи жириглади. Эру хотин бараварига ирғиб туришди. Остонада Нодир кулиб турарди.

— Мактабдан чиқиб бувамникига бордим. Анча соғайиб қолибдилар. Сизларга салом дедилар!

Она ўғлини бағрига босди. Ота эса «Яшавор, ўғлим!» дегандек мамнун жилмайди. «Фақат, бундан кейин борадиган жойингни айтиб кет» дея огоҳлантирди.

Шаҳноза ШОЖАЛИЛОВА,
Зулфия номидаги Давлат
мукофоти совриндори.



Рухингиз тетик бўлсин

ХАРАКАТ – ҲАЁТ ДЕМАК

Мен, 88 баҳорни кўриб қўйдим! Бу айтишгагина осон. Не-не хотиралар, не-не воқеа ва ҳодисалар гувоҳи бўлдим. Мен тенгиларга уч тузумни кўриш насиб этган. Келинг, муборак Наврўз кунларида мен ҳам ўз фикрларим, ўйларим билан ўртоқлашсам.

Болалик вақтимиздаги Наврўз байрамлари кечагидек ёдимда. Байрам нишонланадиган кун барча эркаклар, қари-қартанлар хотин-қизлар, бола-бақралар кенг далага чиқарди. Четдан келган одам далага ҳаёт кўчган деб ўйларди. Миллий таомларимиздан сумалак, ҳалим пиширилди. Одамлар тўда-тўда бўлиб ўтиришарди. Ким уйдан нима олиб чиқса, дастурхонга тўкилган. Кўз очиб юмгунча, катта дастурхон ноз-неъматларга тўлиб кетарди. Туршак, майиз, қанд-курс, нон ва ҳоказолар. Шу кун деҳқонлар ҳўкизларининг шохини мойлаб, оқ латта боғлашиб, кўргазмали чиқиш қилишарди. Йўлимиз оқ бўлсин, деҳқончилигимиз баракали бўлсин, деган ниятда амалга оширилди бу ишлар. Дала аския, ўйинкулги, қий-чувлардан яш-наб кетарди.

Биз бу вақтларда миллий ўйинларимиздан ҳисобланган «Алифбе», «Чиллак», «Арғимчоқ», «Варрак» ўйинларини ўйнардик, кураш тушардик, отларни улоққа кўшардик, ҳаммаси ўзига хос тарзда ўтарди. Сиртдан қараганда, буларнинг бари шунчаки болаларнинг бўш вақтини мазмунли ўтказиш, дам олишларини уюштириш учун ўйлаб топилганга ўхшайди. Аслида ана шу ўйинлар замирида шарқона ахлоқ-одоб, меҳнатсеварлик, тўғрилиқ, ростлик,

каттага ҳурмат, кичикка меҳр-шафқат, болалар тарбиясида ота-она бурчи, ўз навбатида болаларнинг ота-онага меҳри, садоқати, қолаверса, жасорат ва матонатга ундовчи эзгу ният мужассам.

Биргина «Варрак учирини» ни оладиган бўлсак, у берадиган завқ ва ҳузурни фақат варрак учирган кишигина билади. Агар сайҳон, қир жойларда варрак учирган бўлсангиз, роҳат қилиб дам олишинг энг яхши дақиқаларини тўғри баҳолай оласиз. Варрак яшашнинг ўзи ҳам ҳунар. Уни учирини, табиат ҳодисаларини тушунишга бўлган интилишни кучайтиради. Варрак ортидан қир ва текис жойларда югуриш одам танасини чинқитиради. Нафосатни табиатдан ундиришга,

ўз меҳнати билан яратишга одатлантиради. Қишлоқ жойларида варрак ўйинини кенг ёйиш ва мусобақалар ўтказиш туриш, уларга барча оила аъзолари, ота-оналарни жалб қилиш катта тарбиявий аҳамиятга эга.

Яна бир гап. Бобо ва момолар фарзандларига жуда гўдаклигидан ёвуз кучларга қарши биргаллашиб курашиш, жасорат ва матонат, дўстлик, бирлик ва аҳилликнинг фазилатлари тараннум этилган эртак ва дostonлар, афсона ва ҳикоялар, шеър ва ўланларни ўргатиш, бирга ўйнаб, қизиқиш уйғотишга ҳаракат қилганлар.

Биз бу ўйинлар жараёнида чакқон, эпчил, чапдаст, кўркмас ва жасур бўлишга ўрганибгина қолмай, сўзларни тўғри талаффуз қилиш, ҳарфларни таниш, сўз ва гап тузиш, рақамларни бир-бирига кўшиш, кўпайтириш ва айириш амалиётларини ҳам ўзлаштирганмиз. Бошқача қилиб айтганда, ахлоқ-одоб

ва таълим алифбесидан илк сабоқни ана шу ўйинлар майдонида олганмиз.

Лекин, яқин тарихимиздаги узоқ давом этган тобелик, қизил империя ҳукронлиги, коммунистик гоёлар туфайли ҳаётимизнинг бошқа жабҳалари каби болаларни халқ ўйинлари орқали ота-боболар анъаналарига содиқ қилиб тарбиялаш аъмоли ҳам издан чикди. Оналар болаларини алла айтиб, тунгги оромга узатиш ўрнига радио ва телевидение орқали бериладиган «Оқшом эртақлари», «Бай-бай» билан ухлатганлари каби боболар, момолар, оталар ва оналар кичкинтойларга эртак ва дostonлар сўзлаб, халқ ўйинларини бирга ўйнашга вақт тополмайдиган, ҳаёт ташвишлари билан бўлиб, тарбиялари билан шуғулланмайдиган бўлиб қолишди.

Хайриятки, Мустақиллик туфайли Наврўзимиз билан бирга, миллий қадриятларимиз ҳам қад ростлапти.

Кўзим тириклигида, унутилиб кетаётган кўп миллий удумларимиз, болалик ўйинларимизга яна эътибор кучаяётгани, улар тикланаётганини кўриб қувонаман. Наврўз кунлари шу туфайли ҳам мен учун кўшалок шодиёна бўлиб туюлади.

**Турди САИДАХМЕДОВ,
Қибрай тумани.**



«СУМАЛАВИТ»

Аждодларимиз қадимда баҳорги дармонсизлик ва камқувватлик ҳолатига ундирилган буғдойдан сумалак тайёрлаб шифо топишган. Ҳозирги кунда ҳам дунё мамлакатларида соғлом турмуш тарзини танлаган одамларнинг овқат таркибида ундирилган буғдой асосий омиллардан бири бўлиб қолмоқда.

Буғдойни ундириш жараёнида унинг таркибидаги витаминлар ва саломатлик учун муҳим бўлган микроэлементлар миқдори бир неча ўн баробар ошиб кетади. Бунинг натижасида унган уруғнинг тирик қуввати тананинг ички кучларини, унинг ўзини-ўзи тозалаш ва тиклаш каби хусусиятларини рағбатлантиради. Мана шуларни ҳисобга олиб, янги «Сумалавит» қўшимчаси ишлаб чиқарила бошланди.

У ундирилган буғдой, андиз ҳамда ширин мия илдизлари экстрактларидан тайёрланган бўлиб, таркибида С, В1, В2, В6, Е витаминларини ҳамда кальций, темир, магний, мис, хром ва марганец микроэлементлари мавжуд. Қўшимчанинг рецепти 3 йил давомида профессионал фармацевтлар, биологлар ҳамда табиблар томонидан яратилди.

Текширишлар «Сумалавит» болалар ва қарияларга, ҳомиладор аёлларга, ақлий ва жисмоний фаолият олиб борадиганлар учун фойдали эканлигини кўрсатди. Тадқиқотларга кўра у тана иммунитетини ошириши, шлаклардан тозалаши, овқатни яхши ҳазм бўлишига ёрдам бериши, вужуд чидамлилигини ва ҳимоя кучларини ошириши, мия ва юрак фаолиятини яхшилаши маълум бўлди.

Фасл таомлари

Қиёмаси кўккатдан

Наврўз уйғониш ва янгилашни рамзи, янги кун демалди. Ҳар бир фаслнинг ўзига хос зийнати, фазилати бўлади. Лекин уларнинг ичидан Наврўз фаслининг шуқуҳи, файзу таровати ўзгача. Ҳа, Наврўз уйғониш, яшариш, янгилашни, яратиш фаслидир. Уни халқимиз озодалик ва покизалик билан кутиб олади, зеро тозалик, озодалик бор жойда файз-барака бўлади.

Кексаларимиз баҳорнинг илк даракчиси бойчечак, чучмомаларни кўзларига суртиб омонлик-сомонлик, ҳеч кўрмайлик ёмонлик, деб ният қиладилар. Бувиларимиз эса, ердан униб чиққан минг шифобахш кўкатлардан бирор мазали таом тайёрлашга тушадилар. Биз ҳам байрам дастурхонини учун ҳамда баҳорнинг илик узилди маҳалида ушбу шифобахш гиёҳлардан – ялпиз, исма-

лок, откулоқ, кўк пиёз, жағ-жағлардан кўк чучвара, кўк сомса тайёрлаб, истеъмол қилишни тавсия этамиз.

Исмалоқдан илк баҳорда дармондори сифатида фойдаланиш кенг расм бўлган. Кўкат мўътадил бўлганлиги учун ҳам иссиқ, ҳам совуқ мижозларга тўғри келади. Унинг таркибида В₁, В₃, В₆, РР, КЕЕ каби витаминлар, темир, йод, фосфор, калий, кальций, магний каби моддалар учрайди. Унинг сиқиб олинган суви эса, консерва саноатида кўк нўхатга ранг бериш учун ишлатилади. Исмалоқ

баргидан тайёрланган қайнатмани Ибн Сино йўталга, қабзиятга қарши, сафро ҳайдовчи дори воситаси тариқасида



тавсия этган. Камқонлиқни даволашда, парҳез таом сифатида фойдаланилади. Шунингдек, бедармонлик, томоқ, ўпка ва асаб касалликларига шифо бўлиб, пешоб ва дам ҳайдаш хусусиятига эга. Айни баҳорда исмалоқнинг мурғак новда ва барглари-дан ялпиз, откулоқ, жағ-жағ, гулқоқи ўтлари билан бирга сомса, кўк чучвара, манти ва бошқа кўк таомлар тайёрланади.



Откулоқ – аслида ёввойи шовулдир, откулоқ таркибида С, К витаминлари, эфир мойи, органик кислоталар ва бошқа фойдали моддалар мавжуд. Халқ табобатида откулоқ илдизидан ҳамда мевасидан тайёрланган қайнатма ич кетиш, ичак яралари ва бошқа касал-



ликларни даволаш учун ишлатилади. Янги униб чиққанда откулоқ барглари кўкатлар билан қийма қилинади, жазза, кўк пиёз қўшиб, баҳорий таомлар тайёрланади.

Ялпиз – жуда қадим замондан буён халқ табобатида кенг қўлланиб келинадиган хосиятли гиёҳ ҳисобланади. Унинг таркибида эфир мойи, В, А, Р витаминлар, минерал тузлар ва бошқа моддалар мавжуд. Ялпиз иштаха камлигида, меъда заифлигида, шунингдек, ҳиқичоқ тутганда фойда қилади.

Халқимизда **жағ-жағ** кўкатида турли-туман таомлар тайёрлаб, унинг шифобахш хосиятларидан баҳраманд бўлишади. Жағ-жағ ўлкамизнинг барча худудларида ўсади. Уни табобатда қон тўхтатувчи восита сифатида қўллашди, бу ўсимликдан айни баҳор дамлари шифобахш таомлар тайёрлаб истеъмол қилинади.

Матлуба МУСАЕВА,
Паркент тумани марказий
поликлиникасининг олий
тоифали терапевти.





НАВРЎЗИ ОЛАМДУР БУ КҮН

Васли аро кўрдум, тенг эмиш бўйю сочи,
Кун-тун тенг экан, зоҳир ўлур бўлди чу Наврўз,
Алишер Навоий.

* * *

Кун ҳамалға кирди эрса, келди олам Наврўзи,
Кечти Баҳман-замҳарир қиш, қолмайди қори, бузи.
Носириддин Рабғузий.

* * *

Соқиё, келтур май гулгунки хуш дамдур букун,
Олами фархундаи Наврўзи оламдур букун.

Отойи.

* * *

На гул сайр айла, на фикри баҳор эт,
Жаҳондин кеч, хаёли васли ёр эт.

Нодира.

Еткурди сафо ер юзига фасли баҳор,
Очилди гулу лолау насрин бисёр.

Огаҳий.

* * *

Навбаҳор, очилди гуллар, сабза бўлди боғлар,
Сухбат айлайлик, келинлар, жўралар, ўртоғлар!
Муқимий.

* * *

Баҳор айёмида гулгашт этарга бир чаман бўлса,
Қилурға шарҳи ҳол аҳли муҳаббат икки тан бўлса.
Фурқат.

* * *

Этти Наврўз гулчаман хусни расолар хусини,
Ишқиди дил булбули беҳуд мастондур бу кун.
Нозимахоним.

БАҲОР ГУЛЛАРИ ДУНЁСИ

«Ўзэкспомарказ» павильонда манзарали ўсимликлар ва боғдорчилик гулларининг учинчи «Флора-2004» анъанавий миллий кўргазмаси очилди.

Аввалги йилларда булганидек, кўргазма баҳорнинг биринчи оyi — Навруз кунлари — табиатнинг уйғониши ва гўзаллик даврида булиб ўтмоқда.

Унда академик Р.Шредер номидаги мевачилик, узумчилик ва виночилик илмий-тадқиқот институти, Ўрмон хўжалиги илмий-тадқиқот институти, Ўзбекистон Фанлар академиясининг «Ботаника» илмий-ишлаб чиқариш маркази, Тошкент Давлат аграр университети, «Сопол буюмлари», «Совпластитал» корхоналари, «Yashil barg», «Kamolot-faxr», «Престиж-флора» хусусий корхоналари ва кўпгина бошқа ташкилотлар иштирок этди.

Кўргазмадан турли гуллар ва манзарали ўсимликлар, бута, дарахт, арча кўчатлари, гулчилик ва боғбончилик учун керамик буюмлар ва минерал ўғитлар жой олган.

Ташкилотчилар таклифи билан кўргазма ишида илк марта томчилаб сўғориш тизимидаги боғбончилик пуркатгичлари ишлаб чиқарувчи Гомель корхонаси (Белоруссия Республикаси), томчилаб сўғориш учун технология ва жиҳозларни таклиф этувчи «Netafim (A.C.S) Ltd» фирмаси (Исроил) ваколлатхонаси ҳам қатнашди.

ЎЗА.



— Юринг, дугонажонлар, баҳор сайлига...
Нуъмон МУҲАММАДЖОНОВ сурат-лавҳаси.

Биласизми?

ПИЧОҚ ҚАЧОН ЯРАТИЛГАН

Пичоқ энг қадимги рўзғор анжомларидан бири ҳисобланади, унинг яратилиши ҳам жуда узоқ замонларга тўғри келади.

Археологлар Греция худудида қидирув ишларини олиб боришга-

нида қадимда яратилган бир неча пичоққа дуч келдилар. Уларнинг

фикрича, бу топилмалар обсидиан деган жуда қаттиқ тоғ жинсидан бундан сал кам уч миллион йил илгари ясалган экан. Бронза даври бошлангунига қадар пичоқлар тошдан яратилган бўлиб, улар ёғочни силлиглаш, ов қилиш, терини тозалаш, овқат тайёрлаш ва бошқа шу каби юмушларда ишлатилган.

Металл пайдо бўлиши билан «ошхона» пичоқларини темир ва пўлатдан ясаш бошланди. XV аср-

ларга келиб Европада шу мақсадда кумуш, олтидан ҳам фойдаланилган. Уларнинг дастаси безак бўлиб хизмат қила бошлагач олтин ва кумушдан ташқари садаф, қимматли тошлар, эмал, чини, биллурдан ясалиши ҳам йўлга қўйилган. Бандлари кўпинча жониворлар, балиқлар шаклида ишланган. Ошхона пичоқларининг учи эса, Наполеоннинг кўрсатмаси билан ёй шаклида тайёрлана бошлаган. У пичоқни ўткир учи қилиб чиқаришни маън этган.

Bolalik bog'i

Topishmoqlar

Orpoq sandiq ochildi,
Olamga nur sochildi.

(чўқоқни 'уошсо)

Og'a-ini ming botir,
Ko'm-ko'k gilamda yotir.

(оғизини, 'уошсо)

O'yib oldim izi yo'q,
Qilich urdim o'rni yo'q.

(о'йиб)

Qozonda emas, qaynaydi,
Qishin-yozin tinmaydi.

(қозон)

Bir kosa sut, olamga dud.

(кўп)

Bir palakda o'n ikki xatak.

(12, o'n ikki oy)

БУ — ҚИЗИҚ

Англия кутубхоналаридан энг кўп ўғирланадиган китоб — Гиннеснинг рекордлар китоби экан.

Ватиканда 1983 йилдан бери туғилиш ҳолати рўйхатга олинмаган.

Нил дарёси икки марта — IX ва XI асрларда музлаган.

Қадимги Римда бемор операция вақтида ўлса, шифокорнинг қўлини кесишган экан.

Ҳайвонлар орасида чумолининг боши гавдасига нисбатан энг катта жонивор ҳисобланади.

Орангутанг сўзи айрим африкаликларнинг тилида «чангалзордан чиққан одам» маъноси билдиради.

ТОШКЕНТ ҲАҚИҚАТИ
ТАШКЕНТСКАЯ ПРАВДА

Муассис
ТОШКЕНТ
ВИЛОЯТИ
ҲОКИМЛИГИ

Бош муҳаррир
Фатҳиддин
МУҲИДДИНОВ

Телефонлар:
Хатлар ва оммавий
ишлар бўлими: 133-40-48.
Эълонлар:
133-70-10, 136-53-54.

Манзилмиз:
700000, Тошкент
шаҳри, Матбуотчилар
кўчаси, 32.

Тошкент вилояти ҳокимлиги ҳузуридаги
Матбуот ва ахборот бошқармасида
03-001 рақами билан рўйхатга олинган.
Газета «Тошкент ҳақиқати»
таҳририяти компьютер
марказида терилди ва
саҳифаланди.

● Эълон ва билдирув-
лардаги факт ҳамда далил-
ларнинг тўғрилиги учун
реклама ва эълон берув-
чилар масъулдир.